


YINKI KELE MPEVE-SANTU?

 ...mpasi samu na lukutakanu. Lukutakanu yayi ke vwanda lukutakanu ya mutindu yankaka na yina beto ke kuzwaka ntangu nyonso awa. Na kutala, konso ntangu ntangu beto ke kwizaka kintwadi awa, ya kele lukutakanu ya . . . samu na kubeluka ya bimbevo mpe samu na bansatu ya nzutu. Ya kele na zulu ya yawu ti beto ke telamaka. Kasi na nkokila yayi beto me banda lukutakanu ya reveil yayi samu na kubeluka ya moyo, mpeve ya muntu.

Na mutindu nyonso, kana Mfumu zola, Lumingu na suka, na lukolo ya Lumingu, Lumingu na suka, beto ke vwanda na kisambu samu na bantu ya kubela mpe ndonga ya kubeluka ya nzutu ya ntangu nyonso, na Lumingu na suka, kana Mfumu kuzola. Mpe bampimpa ya sabala yayi, beto zola kieleka kukota na mbangu na kuzonzila na bima ya Seko samu na moyo.

² Ntangu yayi, beto zaba ti ntangu nzutu ke belukaka, ya ke salaka beto nyonso kyese, samu ti beto ke zabaka ti ya ke lakisaka mbala mosi ti Nzambi ya beto ke belusaka bambevo. Kasi bantu ya kubela yina, kana ba zinga dyaka mingi, ba lendaka bela dyaka, ya lenda vwanda na mutindu mosi ya kimbevo yina ba kuzwaka kubeluka, mpe yina ke katula ve kubeluka. Dokotolo ke pesa bankisi samu na pneumonie, mpe ya lenda vwanda ti bilumbu zole na ntwala ba ke kufwa na kimbevo ya pneumonie na manima ya yandi me tuba ti ba wandaka mbote. Ya ke vutuka dyaka. Kasi ntangu moyo yango me beluka, beno me kuzwa na ntangu yina, na kati ya beno, Luzingu ya Kukonda nsuka.

³ Mpe mu ke kwikila ti beto me belama mingi na Nkwizulu ya Mfumu Yesu, ti beto fwana sala nyonso yina beto lenda sala samu na kunata konso moyo na Kimfumu, mpe kunata Kimfumu na bantu, ti beto lendaka beluka na bampeve ya beto. Mu ke kwikila ti nzutu ya Yesu kele nzutu ya kulutula kubela yina mu zaba; yina kele, nzutu, nzutu ya Klisto ya kimpeve na zulu ya ntoto, kele kieleka ya kubela.

⁴ Mpe ntangu yayi, beto kele na dibanza ve ya kukanga beno bangunga mingi konso nkokila, samu ti landila nkokila ya ntete beto kele na bisika ya kuvwandila mingi ve samu na bankundi ya beto ya luzolo. Beto kele na dibanza ya kutunga yinzo-Nzambi ya malu-malu, tabernacle ya nene kaka awa na lupangu yayi, to kisika nyonso yina Mfumu ke tswadisa; kasi mutindu beto me zaba, ya kele awa.

⁵ Mpe ntangu yayi beto vwanda me samuna balukutakanu, Kilumbu ya tatu tii Lumingu. Kasi kuna Lumingu, ya ke kusuka na nkonze ya Noël, kasi ya . . . ntangu nyonso yina Mfumu ke

tuba na beto na kusukisa, yina ke vwanda ntangu. Beto zaba kaka ve wapi bandandu ya ke pesa. Kasi na kukwikilaka ti bantu ya tabernacle awa mpe mabuundu ya beto ya kimpangi (bayina kele, mosi ya bawu kele—kele holiness tabernacle na Utica, yina Mpangi Graham Snelling kele pasteur, mpe na New Albany kisika Mpangi—Mpangi Junie Jackson kele pasteur, mpe dyaka yina kele na nzila kuna kisika Mpangi Ruddell kele pasteur), beto na bawu, mabuundu ya kimpangi ya tabernacle yayi, beto ke na kumekaka na kunata . . . bantu ya beto na kati ya kubundana ya mbote na Klisto. Yina kele dibanza ya beto. Na yawu mu me soola na kutanga mpe kulongila, samu na mwa bankokila ke landa . . .

⁶ Na nkokila yayi mu zola kuzonza na dilongi: *Yinki Kele Mpeve-Santu?* Mpe mbasi na nkokila, mu zola kulonga na: *Samu Na Yinki Yawu Kupesamaka?* Mpe samu na Kilumbu ya tanu na nkokila . . . Mpe, samu na bantu yina ke bakaka na bamasini, mu zola ve ti bawu kubaka yawu na Kilumbu ya tanu na nkokila: *Yinki Mutindu Ya Kuzwa Mpeve-Santu?* mpe *Yinki Mutindu Ya Kuzaba Ntangu Mu Me Kuzwa Yawu?* Mpe kuna beto ke bika kaka, na manima kumona wapi mutindu Mfumu ke twadisa beto, samu na Kilumbu ya sambanu mpe Lumingu. Mpe Lumingu na suka, lukutakanu ya kubeluka, mpe lukutakanu yankaka ya kumwangisa nsangu na Lumingu na nkokila.

⁷ Mpe ntangu yayi beto zola ti muntu nyonso kuzaba ti . . . Mpe mu zaba ti bamasini yina ke kangaka ndinga na bande ke na kusalaka na kivinga ya manima, mpe beto zola kutuba yayi. Samu ti, na balukutakanu ya mutindu yayi, ya mutindu ya kumwangisa nsangu, beto ke kuzwa bantu ya mabuundu ya ba-denomination yankaka bayina ba me longukaka mutindu ya bawu mosi ya kukwikila, mosi na mosi. Mpe yina kele nyonso kieleka. Ata mbala mosi ve ti mu me zolaka kuvwanda yina ke nata kukabwana na kati ya bankundi. Mpe samu na balukutakanu na ngaanda, mu ke longaka na mabuundu ya nene ya Makieleka ya Masonuku, landila yina bankundi yina ke simbisaka balukutakanu ya munu ke kwikilaka. Kasi, awa na tabernacle, mu—mu zola kuzonzila yina beto ke kwikilaka. Na yawu, kana beno—kana beno bakula yawu ve, mu ke sepele mingi na kuzwa mwa mukanda to noti me katuka na beno, samu na kupesa munu kyuvu ya—ya samu na yinki ti beto ke kwikilaka yawu mutindu yayi. Mpe mu ke vwanda na kyese na kumeka na kutendula yawu na mutindu ya kulutila yina mu lenda.

⁸ Beno zaba, konso dibuundu, kana beno kele na malongi ve, beno kele dibuundu ve. Beno fwana kuzwa kima yina beno ke telamaka, mwa misiku yina beno ke simbidilaka. Mpe ata na yina muntu kele ya kukangama to na dénomination yina yandi lendaka vwanda, kana muntu yina kele ya kubutuka na Mpeve ya Nzambi, ya kele mpangi ya munu ya bakala to mpangi ya munu ya kento, ata nyonso yina . . . Beto lendaka vwanda ya

kuswaswana na bima yankaka, mutindu ntama kele esete na wesete, kasi beto kele dyaka bampangi. Mpe mu ke sala kima ve kasi kumeka na kusadisa mpangi yango na kutambula mbote, pene-pene mingi na Klisto. Mpe mu ke kwikila ti Muklisto nyonso, ya kieleka ke sala mutindu mosi samu na munu.

⁹ Ntangu yayi, mu vwanda me lomba na tabernacle yayi. . . Ntangu yayi, beto ke na kukotaka na yayi ve kaka samu na kuzwa balukutakanu. Mu zola kukota na yayi, mpe mu zola ti beno, mpe mu vwanda me lomba beno, na kunyengisa konso kyamvu yina kele na manima ya beno, mpe kusungika konso disumu, na yina beto ke na kukota na yayi na nyonso yina kele na kati ya bantima ya beto mpe baluzingu ya beto. Beto fwana kwiza awa na lukanu mosi ya kukubika myoyo ya beto samu na Nkwizulu ya Mfumu, mpe samu na kikuma yankaka ve. Mpe mutindu mu vwanda me zonza mpe me tuba, ti ya lendaka vwanda mbala mosi ti mu lendaka longa to kutuba kima yina lendaka vwanda mwa ya kuswaswana na yina muntu yankaka, na mutindu bawu ke kwikilaka yawu. Mu—mu me—me kwiza ve samu na ntembe, beno me mona, mu—mu me kwiza . . . Beto kele awa samu na kuyilama na Nkwizulu ya Mfumu. Mpe mu banza ti mwa nkonga yayi. . .

¹⁰ Mu kele na mwa bankundi me kwiza tala munu awa mu zaba, yina me katuka bisika yankaka, mpe beto kele na kyese na kuzwa bawu. Mpe kukondwa ntembe ti mwa bisika yankaka na dibuundu awa, ya kele na bayankaka yina me katuka na ngaanda ya mbanza, na bisika nyonso ya mwa bambanza ya beto ya ntama ve awa. Mpe beto kele na kyese na kuzwa beno, mpe me tonda beno mingi, kana beno zola beto ya kulutila na kwiza kuwa bima yayi. Nzambi. . . Ti beno nata na kuvutuka ya beno na yinzo, mpangi ya munu ya bakala, ya kento, bimvwama ya ntalu ya Nzambi lendaka tsyamuna na ntima ya beno, ya kele kisambu ya munu.

¹¹ Mpe na mwa tabernacle yayi, mutindu mu ke kwikilaka ti ya kele mosi ya bantu ya kulutila mbote yina mu ke kwikila yina kele na ntoto, ke kwizaka na tabernacle yayi. Ntangu yayi, ata mbala mosi ve ti mu me tuba “nyonso” ya bantu ya kulutila mbote. Mu me tuba mosi ya bantu ya kulutila mbote na ntoto ke kwizaka na tabernacle yayi. Kasi mutindu kilumbu na manima ya kilumbu, na kuvutukaka, na kukatukaka lukutakanu na manima ya lukutakanu, mu ke mona nsatu ya nene ya tabernacle yayi, nsatu ya nene na kati ya yawu, mpe ya kele kufuluka, to kupesama, luzingu ya kukota mingi, kutambula mosi pene-pene na Nzambi. Mpe mu me sila bawu na kusala yayi, samu na kuzwa Bansangu yayi samu na bawu. Mpe beto kele na kyese na kutula beno na kati mpe kubundana na beto pene-pene ya Ndinga ya Nzambi, mutindu beto ke longisaka mpe ke mekaka na kulakisa.

¹² Ntangu yayi, bankokila tatu ya ntete beto ke baka dilongi ve samu na kulonga, kasi Nsangu ya kulongisa na Ndinga ya

Nzambi.

Mpe ntangu yayi, samu, mu ke lomba muntu ve na kusala kima yina mu ke lenda kusala munu mosi ve. Mpe lumingu yayi me vwanda Calvaire ya nene samu na munu. Mu vwandaka me wombisa kwandi mabanza na—na kutala, mutindu mu lenda zonza yawu, na kutala mu vwandaka dyaka ve na kati ya munu mosi. Kasi mu vwanda me kupesa ya muvimba konso luzolo, mpe nyonso yina mu zaba, na Mfumu.

¹³ Mpimpa yankaka yina, ya vwandaka na kutala fyoti na manima ya kati-kati ya mpimpa, kento ya munu na munu, na manima ya kuvwanda ya kutelama mingi kulutila bantangu yankaka, mpe vwanda sambila mpe vwanda zonza na Mfumu, na lweka yayi mpe yankaka ya mwa zuni na... kisika ya beto ya kusolula ya yinzo, na Babiblia zole ya kufunguka, beto kumipesaka beto mosi mbala mosi dyaka na Nzambi, samu na kisalu ya muvimba, ti beto ke bika baluzolo ya beto mosi, mpe nyonso, mpe konso dibanza ya yimbi, mpe kusadila Mfumu Yesu.

Mpe mu ke na kivuvu ti ya me vwanda nkadulu ya beno, mpe, ti beno vwanda me sala kima mutindu mosi. Na yina ntangu beto ke na kwiza na nkokila yayi, beto ke na kwiza na ntoto ya santu, na kati-kati ya bantu yina vwandaka na kati ya bisambu, mpe me manga kudya, mpe me vutula nionso, mpe me yilama na kuzwa kima na Nzambi. Mpe mu zaba ti yandi yina ke kwiza nsatu ke vutuka ve na nsatu, kasi Nzambi ke pesa yandi Dimpa ya Luzingu ya kudya.

¹⁴ Ntangu yayi, ntete beto tanga na Buku ya Yandi ya santu, bika beto kukulumusa bayintu ya beto mwa ntangu kaka fyoti samu na bisambu.

¹⁵ Mfumu, bisambu vwandaka me pesama yimeni na kisika yayi na nkokila yayi. Ya me vwanda...bankunga ya Sion vwandaka me yimbama na bana ya Nge. Bantima ya bawu vwandaka me zanguka. Mpe beto me kwiza awa samu na kumipesa beto mosi na Nge, mpe samu na kukembila Nge na kati-kati ya moyo ya beto. Mpe beto ke na kubambula Nge moyo, Mfumu, ti Nge tubaka ntangu Nge vwandaka ya kuvwanda na zulu ya mongo mpe tubaka na bilandi ya Nge, “Kyese na bayina ke na nsatu mpe mpwila ya kusala mambu ya kudedama, samu ti bawu ke fuluka.” Nge silaka yawu, Mfumu. Beto ke na kukwiza na nkokila yayi na bantima ya kufunguka. Beto ke na kwiza, na nsatu mpe mpwila, mpe beto zaba ti Nge ke kangama na nsilulu ya Nge.

¹⁶ Na yina beto zola kufungula ba-page ya santu yayi ya Biblia, samu na kutanga na Yawu yina kele na kati, ti Mpeve-Santu kunata kaka Yawu na konso ntima. Mpe ti Nkuna yango kubwa na kati mingi, na lukwikilu ya vwama yina ke nata konso nsilulu yina Ndinga kusalaka. Kuwa beto, Mfumu, mpe vedisa beto, mpe meka beto. Mpe kana ya kele na kima nyonso ya kutsya ve

na beto, Mfumu, disumu nyonso ya kufunguka ve, nyonso yina kele ya kusungika ve, lakisa yawu kaka ntangu yayi, Mfumu, beto ke kwenda malu-malu yayi kukwenda sala yina beto fwana sala, samu ti beto me bakula ti beto ke na kuzinga na bivudi ya Nkwizulu ya Mfumu Yesu. Mpe beto, O Nzambi ya Santu, me kwiza na bivudi ya ludedomo ya Nge—ya Nge na nkokila yayi, mpe beto ke na kulomba mbwekolo ya malu-malu, mpe kupesama, mpe kufuluka ya Mpeve-Santu na baluzingu ya beto.

¹⁷ Mutindu beto ke na kumona batiya ya mvumbukulu kubanda na kukulula, ti beto bwela yinti ya Ndinga, samu ti Yawu pesa tiya ya malu-malu, ti bantima ya beto kuvwanda ya kufuluka ya kupesa. Santisa beto, Mfumu, na nzila ya Ndinga ya Nge ya kitoko mpe Menga ya Nge, mpe lemvo ya Nge, beto ke lombamba na malembe. Mpe matondo nyonso mpe nkembo ke vwanda na Nge. Katula kufundisa nyonso ya mbangu na bantima ya beto. Vedisala beto, O Mfumu. Pesa beto bantima ya kuvedila, mpe maboko ya kukondwa mvindu, mpe mabanza ya kusukula, ti beto lendaka kwiza na sanctuaire ya Nge, nkokila na manima ya nkokila, kukembila mpe kufuluka na Mpeve ya Nge. Beto me lombamba yayi na Nkumbu ya Yesu, mpe samu na Yandi. Amen.

¹⁸ Mu zola kutanga Ndinga kaka malu-malu yayi. Mpe na yina . . . Mu lombamba na beno na kunata Babiblia ya beno, bilapi ya beno, mikanda ya beno, samu na Masonuku. Kana beno zola yawu, ya ke vwanda mbote mingi. Mpe ntangu yayi na yina beno ke na kusosaka kapu ya 7 ya Actes, samu na kubanda; samu na kupesa mvutu na kyuvu, to samu na kubanda na kupesa mvutu na kyuvu: *Yinki Kele Mpeve-Santu?*

¹⁹ Ya kele na kima ve yina ke nunga Satana, ya kele na ata kima mosi ntete ve na zulu ya ntoto yina me nungaka Satana, mutindu Ndinga ya Nzambi. Yesu bakaka Yawu na ntangu ya mvita ya Yandi ya nene; Yandi tubaka, “Ya kele ya kusonama . . .”

²⁰ Mpe na suka yayi, na yina mu vwanda kuwa, mwa bilumbu me luta, na nsamununu mosi yina vwanda zola kutuba ti ngidikulu kusalamaka kaka na bombi yina mupepe vukisaka, mpe na phosphate, mpe na mwa bankisi ya ntoto, mpe ti tiya ya mwini kusalaka nkuna ya luzingu mpe basisaka luzingu. Wapi mutindu ya buzoba! Na yina, mwini ke kufwa konso nkuna ya luzingu. Beno tula nkuna na ngaanda na mwini, ya ke kufwa yawu na mbala mosi. Mpe ya kele ve na kima mutindu yina; kasi Satana vwanda meka na kundimisa munu yawu. Mpe na manima ya kubika mwa Rébecca ya munu na lukolo na suka yayi, mpe na nzila ya kuvutuka, mu me banda na kunamisa dyaka ladyo; mpe mu banzaka mu ke vutuka dyaka na dyambu yango, na yawu mu kufwaka kaka yawu.

Mpe na yina mu vwanda mata bala-bala, Satana me tuba na munu, yandi tubaka, “Nge zaba ti Muntu yayi yina nge ke bokilaka Yesu vwandaka kaka muntu mutindu, kilumbu mosi na

bilumbu ya Yandi, mutindu Billy Graham to Oral Roberts. Yandi vwandaka kaka muntu yina mwa bantu bandaka na kuvukana pene-pene ya Yandi mpe vwanda tuba ti Yandi kele Muntu ya nene, mpe na manima ya mwa ntangu Yandi kumaka nene mingi, mpe kuna Yandi kumaka nzambi samu na bawu. Mpe ntangu yayi ya me tsyamuka yinza nyonso, katuka lufwa ya Yandi, mpe kaka yina.”

²¹ Mu banzaka, “Wapi mutindu ya muntu ya luvunu nge kele!” Mpe kuna me baluka kaka na yina mu vwanda sabuka Graham Bala-bala. Mu tubaka, “Satana, nge yina ke na kuzonzaka na konsiansi ya munu, mu zola kuyufula nge mwa bima. Nani ya vwandaka yina bapofete ya ba-Hébreux kuzonzilaka na yina zolaka kwiza? Yina vwandaka Mesiya ya kukusa? Yinki vwandaka na zulu ya bantu yango yina monaka Yandi ntete mpe tubaka luzingu ya Yandi, mafunda ya bamvula ntete Yandi kwiza awa? Nani vwandaka yina tubaka yawu ntete kaka mutindu na mukanda? Mpe ntangu Yandi kwizaka, ba tubaka, ‘Yandi vwandaka ya kutula na lutangu ya bimpumbulu,’ mpe Yandi vwandaka. ‘Yandi lwalaka samu na masumu ya beto,’ mpe Yandi lwalaka. ‘Ba tulaka ndyamu ya Yandi na bantu ya bivwama, kasi Yandi zolaka vumbuka na lufwa, na kilumbu ya tatu,’ mpe Yandi vumbukaka na lufwa. Mpe na manima Yandi silaka Mpeve-Santu, mpe mu kele na Yawu. Na yawu nge ke sala kaka mbote na kukwenda ntama na Yawu, samu ti ya kele ya kusonama na Ndinga, mpe konso Mpova kele kieleka.” Kuna yandi kwendaka. Beno pesa kaka yandi Ndinga, yina ke sukisa yawu. Yandi lenda telemina Ndinga yina ve, samu ti Yawu kele dibanza me katuka na mazulu.

Beto banda kutanga na nkokila yayi na kapu ya 7 ya Buku ya Actes.

Nganga-Nzambi ya ntete yifulaka, Mambu yina kele ya kieleka?

Mpe yandi tubaka, Bampangi, mpe bankundi, mpe tata, beno kuwa; Nzambi ya nkembo kumonanaka na tata ya beto Abraham, na yina yandi vwandaka na Mésopotamie, ntete yandi kwenda kuzinga na Charran,

Mpe tubaka na yandi, Katuka yinsi ya nge, mpe bika dikanda ya nge, mpe kwenda na yinsi yina Mu ke lakisa nge.

Na yina yandi basikaka na yinsi ya ba-Chaldéen, mpe kwendaka zinga na Charran: mpe kuna, na manima ya lufwa ya tata ya yandi, yandi nataka yandi na yinsi yayi, kisika beno ke na kuzinga ntangu yayi.

Mpe yandi pesaka yandi ata lupangu, ve, to ata mwa kisika ya fyoti: kasi yandi pesaka yandi nsilulu ya kupesa yandi yinsi yina, mpe na nkuna ya yandi na

manima ya yandi, kasi na ntangu yina yandi vwandaka ntete ve na mwana.

. . . Nzambi zonzaka na yandi mutindu yayi, Ti nkuna ya yandi ke zinga na yinsi ya nzenza; mpe ti bawu ke vwanda bandongo, mpe ba ke talisa bawu mpasi na bamvula nkama yiya.

Kasi mu ke fundisa yinsi yina ba ke vwanda bandongo, tubaka Nzambi: mpe na manima bawu ke katuka kuna, mpe ke kwiza kusambila munu na yinsi yayi.

Mpe yandi pesaka yandi ngwisani ya kuzengisa bubakala: mpe na yawu Abraham butaka Isaac, mpe zengaka yandi bubakala na nana; mpe Isaac butaka Jacob; mpe Jacob butaka batata kumi na zole.

²² Na zulu ya yayi, beto zola kukota na dilongi, yina mu banza kele dilongi ya mutindu yankaka samu na bubu yayi, ya . . . *Yinki Kele Mpeve-Santu?* Yinki Yawu kele? Mpe, ntangu yayi, nsasa mu me baka dilongi yayi na kulandaka yankaka mutindu yayi, beno lenda kwiza ve mpe kuzwa Mpeve-Santu kana ti beno zaba yinki Yawu kele. Mpe beno lenda ve kuzwa Yawu, kana beno zaba yinki Yawu kele, kana ti beno ke kwikila ti Yawu pesamaka na beno, mpe ti Yawu kele samu na beno. Mpe, dyaka, beno lenda ve kuzaba kana beno kele na Yawu, to ve, kana ti beno zaba wapi bandandu Yawu ke nataka. Na yawu kana beno zabaka yinki Yawu kele, mpe samu na nani Yawu kele, mpe wapi kisalu Yawu ke nataka ntangu Yawu ke kwizaka, kuna beno ke zaba yinki kele na beno ntangu beno ke kuzwa Yawu. Beno me mona? Yina kaka ke sukisa yawu.

²³ Kaka mutindu mu vwandaka zonza na Mpangi ya beto Jeffries bubu yayi, mpe yandi tubaka, “Mu zola kuvwanda na lukutakanu na nkokila yayi, kasi mu ke vwanda kuna mbasi na nkokila.” Yandi zabaka ve ti beto vwandaka na balukutakanu, kaka awa; samu ti beto samunaka yawu ve. Ndambu ya . . . Mpangi Léo mpe bayankaka sonikaka na bankundi ya beto mpe tubaka na bawu, na ngaanda ya mbanza. Mbote, samu ti beto ke na bisika mingi ve.

²⁴ Kuna mu tubaka, “Mpangi Jeffries, kana nge fidisa munu na yisi na kunamisa mosi ya mabulu ya nge ya pitiloyi, mpe ti mu zaba kima mosi ve na yawu, kieleka mu ke sala yawu kubaka tiya. Mu lendaka balula fungula ya yimbi to kunamisa masini ya yimbi. Mu fwana zaba mutindu ya kusala yawu ntete mu sala yawu.”

Mpe ya kele mutindu na kuzwa Mpeve-Santu. Beno fwana zaba yina beno ke na kusosa, mpe mutindu ya kuzwa Yawu, mpe yinki Yawu kele.

Ntangu yayi, na kubanda, Mpeve-Santu silamaka.

²⁵ Beto lenda baka balumingu kumi mpe ti ata mbala mosi ve. . .kaka kukuma fyoti na dilongi yayi, yinki Mpeve-Santu kele. Kasi, kima ya ntete, mu zola kukota na yawu mwa mingi samu na kupesa banzila ya nene konso nkokila, na manima kumona kana ya ke vwanda na biuvu na nkokila yina ke landa.

²⁶ Bantu yikwa awa me kuzwa ntete ve Mpeve-Santu, me botama ve na Mpeve-Santu? Beno telemisa maboko ya beno; beno zaba ti beno me kuzwa ntete ve. Beno tala kaka maboko.

Ntangu yayi mu zola kuzonzila na Yawu, Mpeve-Santu mutindu kidimbu, samu ti Yawu kele kidimbu. Beto ke bakula ti, ti bansilulu nyonso kele ya kupesa na beto na nzila. . . Abraham vwandaka tata ya nsilulu, samu ti Nzambi pesaka nsilulu na Abraham mpe na Nkuna ya yandi na manima ya yandi. Ba salaka nsilulu “na Abraham mpe Nkuna ya yandi.” Mpe kidimbu yayi kele samu na bantu ya ngwisani.

²⁷ Ntangu yayi, ya kele na luswaswanu ya nene na kati ya Muklisto ya mpamba mpe Muklisto ya kifuluka na Mpeve-Santu. Mpe ntangu yayi beto ke mona yawu na Masonuku, mpe kieleka kutula kaka yawu na Masonuku. Na kubanda, ya kele na Muklisto yina ke salaka mutindu Muklisto. Kasi kana Muklisto yayi me fuluka ntete ve na Mpeve-Santu, yandi kele kaka na nzila ya kuvwanda Muklisto. Beno me mona? Yandi ke sala mutindu ya kukwikila Yawu; yandi ke kota na kisalulu samu na Yawu, kasi Nzambi me pesa yandi ntete ve Mpeve yayi, ya Mpeve-Santu. Yandi me kuma ntete ve na lukanu yina na Nzambi, ti Nzambi me zaba yawu.

²⁸ Samu ti, ti, Nzambi kusalaka ngwisani na Abraham, na manima Yandi kubokilaka Abraham, yina kele kifwanusu ya kubokila mukwikidi bubu yayi.

Yandi bokilaka Abraham, mpe Abraham bikaka yinsi ya yandi mpe kwendaka na yinsi ya nzenza, samu na kuzinga na kati ya bantu ya nzenza, mpe yina vwandaka kifwanusu ya ntangu Nzambi ke bokilaka muntu na kusukisa na bumyangu ya yandi, kubalula ntima na disumu ya yandi. Kuna yandi ke bika nkonga yina yandi vwanda vwandaka, samu na kuzinga na nkonga ya malu-malu, na kati ya mitindu ya bantu ya malu-malu.

Mpe kuna na manima Nzambi kutalaka Abraham ya kukwikama na nsilulu yina Nzambi pesaka yandi, ti yandi zolaka kuzwa mwana, mpe na nzila ya mwana yayi ntoto nyonso zolaka vwanda ya kusakumuna, na manima Nzambi singisaka lukwikilu ya yandi na kupesaka yandi kidimbu, mpe kidimbu yango vwandaka kuzengisa bubakala. Mpe kuzengisa bubakala kele kifwanusu ya Mpeve-Santu.

²⁹ Banzila ya kapu yayi yina ke landa kaka yina beto me tanga, kana beno zola kusonika yawu. Mpe. . . Étienne tubaka, na nzila ya 51:

Beno bantu ya yintu-ngolo . . . bantima mpe makutu ya beno kele ya kukangama, beno ke teleminaka konso ntangu Mpeve-Santu: mutindu batata ya beno kusalaka, mutindu mosi mpe beno.

³⁰ Kuzengisa bubakala kele kifwanusu ya Mpeve-Santu. Mpe Nzambi pesaka Abraham kidimbu ya kuzengisa bubakala na manima yandi kundimaka Nzambi na nsilulu ya Yandi mpe kwendaka na yinsi ya nzenza. Beno me mona? Ya vwandaka kidimbu.

Mpe bana ya yandi nyonso, mpe nkuna ya yandi na manima ya yandi, zolaka vwanda na kidimbu yayi na nzutu ya bawu, samu ti ya vwandaka kima ya luswaswanu. Yawu vwandaka samu na kukabula bawu na bantu nyonso yankaka, kidimbu yayi ya kuzengisa bubakala.

³¹ Mpe ya kele yina Nzambi ke sadilaka bubu yayi. Yawu kele kidimbu ya kuzengisa bubakala ya ntima, Mpeve-Santu, yina ke sala Dibuundu ya Nzambi kuvwanda Dibuundu ya kukabuka na ba credo nyonso yankaka, balukwikilu mpe ba-dénomination. Ba kele na kati ya mitindu nyonso ya ba-dénomination, kasi dyaka ba kele bantu ya kukabuka. Beno bika munu kuzonza na muntu baminuti zole, mu lendaka tuba na beno kana yandi me kuzwa Mpeve-Santu to ve; mutindu mosi na beno. Yawu ke kabisa bawu. Yawu kele kidimbu. Yawu kele kidimbu mosi. Mpe Mpeve-Santu kele kidimbu. Mpe ya kele . . .

Mwana nyonso yina vwandaka manga kuzengisa bubakala na Ngwisani ya Ntama, yina vwandaka lakisa Mpeve-Santu na ntwala, ba zolaka katula yandi na kati-kati ya bantu. Yandi zolaka kubundana ve na bayankaka ya dibuundu, kana yandi mangaka ti ba zenga yandi bubakala.

Ntangu yayi beno tula yawu na bubu yayi. Muntu yina ke manga na kuzwa mbotika ya Mpeve-Santu, lenda kubundana ve na bayina ke na Mpeve-Santu. Beno lenda kaka ve kusala yawu. Beno fwana vwanda na luzingu. Ya kele, mutindu . . .

³² Mama ya munu kuna vwanda tubaka, “Bandeke ya bansala mosi ke pumbukaka kintwadi.” Mbote, ya kele kingana ya ntama, kasi ya kele ya kieleka. Beno ke monaka ve bayembe mpe bankwankwa kubundana. Kudya ya bawu kele ya kuswaswana. Mitindu ya bawu kele ya kuswaswana. Bansatu ya bawu kele ya kuswaswana.

Mpe ya kele mutindu ya kele na yinza mpe na Muklisto ntangu beno me kuzwa *kuzengisa bubakala* na nzila ya Mpeve-Santu, yina zola kutuba, “kukatula musuni.”

³³ Kuzengisa bubakala zolaka vwanda kaka ya kusala na babakala. Kasi kana kento vwandaka ya kukwela na bakala, kento vwandaka kitini ya bakala, yandi vwandaka ya kuzengisa bubakala na yandi. Beno ke bambuka moyo, na Timothée, kisika Yawu kele ya kutuba na kati kuna, “Kento ke kuzwa mpulusu

na kubuta bana, kana yandi zinga na lukwikilu mpe busantu na nkadulu ya kulunga.”

³⁴ Ntangu yayi, kuzengisa bubakala. Beno zaba ntangu... Sarah sekaka na tenta na manima ya yandi, na nsangu ya Wanzio, ntangu Yandi tubaka, “Abraham,” na kuzabaka ve nani yandi vwandaka, nzenza, “wapi kisika kele kento ya nge, Sarah?” Wapi mutindu ti Yandi zabaka ti yandi vwandaka na kento?

³⁵ Mutindu Yesu tubaka, “Mutindu ya vwandaka na bilumbu ya Lot, mutindu mosi ya ke vwanda na nkwezulu ya Mwana ya muntu.” Beno bambuka moyo, bidimbu yango salamaka ve na Sodome mpe Gomorrhe, na kati ya yinza, na kati-kati ya misambidi. Kasi ya vwandaka samu na Musolami, yina ba bokilaka na kubasika. Mpe Abraham vwandaka ya kubokila na kubasika. Mpe mpova *dibuundu* zola kutuba “yina ba me bokila na kubasika; ya kukabuka,” mutindu Abraham kukabukaka yandi mosi mpe yina ba zengisaka bubakala.

Mpe kuna ntangu Sarah sekaka na nsangu ya kieleka ya Wanzio, Nzambi zolaka kufwa yandi na mbala mosi; kasi Yandi zolaka simba Sarah ve kukondwa kusimba Abraham, samu ti ba vwandaka mosi. Yandi vwandaka kitini ya yandi. “Beno kele dyaka ve zole, kasi mosi.”

³⁶ Na yawu, kuzengisa bubakala, Mpeve-Santu bubu yayi ke zengisaka ntima. Mpe ya kele kidimbu, kidimbu ba pesaka.

Muntu tubaka kilumbu yankaka yina...Mu ke na kuvutukila yayi, samu na kusakana ve. Samu ti, ya kele kieleka, kasi ya ke wakana mutindu kusakana. Mutindu mu ke tubaka yawu bambala mingi, yayi kele kisika ya kusakana ve. Kasi ya vwandaka na ntwenya mosi ya muntu ya Allemagne na Simu ya Wesete, kisika beto me vwanda ntama mingi ve. Yandi kuzwaka Mpeve-Santu. Mpe yandi vwandaka tambula na bala-bala, mpe yandi vwandaka tambula fyoti, mpe yandi vwandaka telemisa maboko na zulu mpe vwandaka zonza na bandinga ya malu-malu. Mpe yandi vwandaka kima, mpe vwandaka dumuka, mpe vwandaka boka. Mpe na kisalu, yandi vwandaka landila mutindu yina, mpe mfumu ya yandi ya kisalu tubaka na yandi, “Wapi kisika nge me vwanda?” Uh-huh. Mu me zola bisika yina nge me vwanda. Yandi tubaka, “Nge fwana me vwanda na kati-kati ya nkonga ya bantu ya kulawuka.”

Yandi tubaka, “Na yina nge banza ti bawu kele bantu ya kulawuka?”

Yandi tubaka, “Kieleka, ba kele yawu.”

³⁷ Yandi tubaka, “Mbote, nkembo na Mfumu samu na bantu ya kulawuka!” Mpe yandi tubaka, “Nge zaba yinki? Ba-écrou ke salaka kisalu ya nene.” Yandi tubaka, “Mutindu, ditoma, kana beno katula ba-écrou nyonso na yawu, beno ke kuzwa kima ve

kasi kikunku ya ‘bitini na bitini ya bisengo.’” Kuna ya kele kaka na kutala kieleka.

³⁸ Beno kele kaka mutindu yankaka ntangu Mpeve-Santu ke kwiza na zulu ya beno, tii mpeve ya yinza yayi ke zola beno ve, mpe ke telemina beno, mpe ba ke zola kusala kima ve na beno, ata fyoti ve. Beno kele ya kubutama ya Yinza yankaka. Beno kele kaka nzenza mutindu kulutula, beno ke vwanda nzenza kulutula bambala kumi, kana beno kwenda ntama mingi na bizunga ya bamfinda ya Afrika. Beno kele mutindu yankaka ntangu Mpeve-Santu ke kwiza, mpe Yawu kele kidimbu. Yawu kele kidimbu na kati-kati ya bantu.

³⁹ Ntangu yayi, beno ke tuba, “Na yina, Mpangi Branham, kidimbu yina ya kuzengisa bubakala kupesamaka na Abraham?” Ya kele kieleka. “Mpe na Nkuna ya yandi?” Yinga.

⁴⁰ Mbote mingi, ntangu yayi beto ke luta na Galates, na kapu ya 3, na nzila ya 29, mpe kumona mutindu yawu ke tulama na beto. Galates 3:29, mpe kumona kaka mutindu kuzengisa bubakala yayi lendaka kutulama na Muntu ya makanda, kana beto kele Bantu ya makanda; yina, na nzila ya lubutuku ya beto ya kimuntu.

Ntangu yayi, na kubanda, mu zola kutanga nzila ya 16.

Kasi nsilulu kupesamaka na Abraham mpe nkuna ya yandi. (Abraham na nkuna ya yandi!) Yandi tubaka ve, Mpe na bankuna, . . .

Kaka konso mutindu ya . . . tuba, “Oh, mu kele bankuna ya Abraham, mpe.” Ve. Na “Nkuna,” Nkuna ya Abraham!

. . .Ve na bankuna, mutindu bantu mingi; kasi mutindu muntu mosi, Mpe na—na bawu. . .Mpe na nkuna ya yandi, yina kele Klisto.

⁴¹ Klisto vwandaka Nkuna ya Abraham. Beno ke kwikila yawu? Mbote mingi, ntangu yayi beto baka nzila ya 28 mpe ya 29.

Ya ke dyaka ve na Juif to Grec, ya kele dyaka ve na bandongo to bantu ya kimpwanza, ya kele dyaka ve na bakala to kento: samu ti beto nyonso me kuma muntu mosi na Klisto Yesu.

Kana beno kele ya kukangama na Klisto, beno kele nkuna ya Abraham, mpe kele bilandi landila nsilulu.

Wapi mutindu beto ke kuma “Nkuna ya Abraham”? Na kuvwandaka na kati ya Klisto, kuna beto kele Nkuna ya Abraham. Mpe yinki vwandaka Nkuna ya Abraham? Na yina, beto ke landa na Romains 4 mpe bisika yankaka.

Ata mbala mosi ve ti Abraham kuzwaka nsilulu na yina yandi vwandaka ya kuzengisa bubakala. Samu na kulakisa ti

kuzengisa bubakala vwandaka kaka kifwanusu, yandi kuzwaka nsilulu *ntete* yandi vwanda ya kuzengisa bubakala. Mpe ya vwandaka kifwanusu, samu na kuzaba lukwikilu ya yandi yina yandi kuzwaka *ntete* yandi vwanda ya kuzengisa bubakala.

⁴² Ntangu yayi, ntangu beto keke na kati ya Klisto, beto ke kuma Nkuna ya Abraham mpe keke bibiyadi na Klisto, na yawu, ata nani beto keke, Juif to Muntu ya makanda.

Mpe, “Nkuna ya Abraham,” Nkuna ya Abraham ke na lukwikilu ya Abraham, yandi ke bakaka Nzambi na Ndinga ya Yandi. Ata mutindu buzoba Yawu lendaka monana, mutindu kisalu ya beno lendaka vwanda mutindu yankaka, mutindu Yawu lendaka kumisa beno muntu ya kubaluka, beno ke baka Nzambi na Ndinga ya Yandi ata mutindu nyonso.

⁴³ Abraham na mvula makumi sambwadi na tanu, mpe Sarah na makumi sambanu na tanu, kubakaka Nzambi na Ndinga ya Yandi, mpe bokilaka kima nyonso yankaka na Yawu mutindu ti ya vwandaka ve. Yinki beno ke banza ti badokotolo kubanzaka, na kilumbu yina? Yinki beno ke banza ti bantu kubanzaka, ntangu bawu monaka kiboba ya bakala yayi, ya bamvula makumi sambwadi na tanu, kukembila Nzambi bisika nyonso, yandi vwandaka “vingila bébé” na kento ya yandi, mpe yandi vwandaka na bamvula makumi sambanu na tanu, na kutala ntangu ya bukento sukaka bamvula makumi zole na tanu? Kasi, beno me mona, ya ke sala beno kusala ya kubaluka, lukwikilu ya Abraham.

⁴⁴ Mpe ntangu beno keke ya kuzengisa na Mpeve-Santu, Yawu ke sala kima mutindu mosi na beno. Yawu ke sala beno kusala bima yina beno vwandaka banza kusala ve. Yawu ke sala beno kubaka nsilulu ya Nzambi mpe kukwikila Nzambi.

⁴⁵ Ntangu yayi, Yawu keke mpe, na kuluta nsilulu mpe kidimbu, Yawu keke mpe kidimbu. Ntangu yayi kana beno baka na munu Romains. Na *ntete*, mu zola beno kubaka na munu na Éphésiens 4:30, mpe beto tanga awa minuti fyoti. Éphésiens 4:30 ke tuba yayi.

Ntangu yayi, beno me kuwaka bantu mingi kutuba ti bima ya mutindu yankaka keke bidimbu. “Kana beno kota dibuundu, beno me kuzwa kinyemo ya dibuundu.” Mpe bantu yankaka ke tuba, “Ya keke kuzitisa kilumbu mosi, kilumbu ya Saba, yina keke—yina keke kidimbu ya Nzambi.” Bayankaka ya bawu ke tuba, “Kana beto kuma ba-membre ya dénomination mosi, beto keke ya kutula kidimbu na kati ya Kimfumu ya Nzambi.”

⁴⁶ Ntangu yayi, Biblia ke tuba, “Ti konso dyambu ya muntu kuvwanda luvunu, mpe ya Nzambi kuvwanda Kieleka.” Ntangu yayi, Éphésiens 4:30 ke tangama mutindu yayi:

Beno nyongisa ve Mpeve-Santu ya Nzambi, na nzila ya yina beno kutulamaka kidimbu samu na kilumbu ya mpulusu.

47 Mu fwana kuzwa mwa ndambu ya ngolo samu na yayi awa, samu na kukumisa yawu pwelele. Ntangu yayi, nge nkundi ya kukangama na misiku vwanda kaka swi mwa ntangu fyoti. Beno me mona? Beno me tala ntangu yina kidimbu yango ke baka? Ve tii reveil yina ke landa, tii ntangu yankaka kima ke tambula mbote ve. “Tii kilumbu ya mpulusu,” ya kele lutangu ya ntangu beno ke vwanda ya kutula kidimbu. “Tii kilumbu ya mpulusu,” ntangu beno ke vwanda ya kukuula samu na kuvwanda na Nzambi, ya kele lutangu ya ntangu Mpeve-Santu ke tula beno kidimbu. Ve katuka reveil na reveil; kasi Seko na Seko, beno kele ya kutula kidimbu na nzila ya Mpeve-Santu.

Ya kele yina Mpeve-Santu kele, Yawu kele kidimbu ya Nzambi, yina ke lakisa ti Yandi me kuzwa . . . beno me kuzwa lemvo na meso ya Yandi, mpe Yandi zola beno, mpe Yandi ke kwikila na beno, mpe Yandi me tula kidimbu ya Yandi na zulu ya beno. Yinki kele kidimbu? Muntu . . . Mbote, *kinyemo* ke lakisa to zola kutuba “kisalu me manisa.” Amen. Nzambi me vuukisa beno, me santisa beno, me sukula beno, me tala lemvo na beno, mpe me tula beno kidimbu. Yandi me manisa. Beno kele kivangu ya Yandi tii kilumbu ya beno ya lukululu. *Ya kutula kidimbu* kele “kima me manisa.”

Yinki kele Mpeve-Santu? Yawu kele kidimbu. Beto ke baka yawu mwa ntangu fyoti na mantwala, na Nsangu yankaka, kidimbu yina Paul kuzonzilaka. Bandinga vwandaka kidimbu samu na mikwikidi, to, bantu ya ntembe.

48 Ntangu yayi beno tala, kasi, na yayi, Mpeve-Santu kele kidimbu. Mu zola kutuba . . . Mpe Mpeve-Santu kele kidimbu. Yawu kele kidimbu yina Nzambi pesaka na bana ya Yandi ya kusoola. Kumanga Yawu, kele kukatuka na bantu; mpe kuzwa Yawu, kele kusukisa na yinza mpe nyonso ya bima ya yinza, mpe kuvwanda kivangu yina Nzambi me tula kidimbu ya kundima.

49 Mu vwanda salaka na nzila ya masini awa na Harry Waterberry, mpe beto vwanda fulusa ditoma. Mpangi ya munu, Doc, ya kutelama na manima kuna, vwanda sadisa na kufulusa matoma. Ntangu ditoma ya masini vwanda fuluka, ba vwanda lutila na ditoma yina, mfumu ya kutala, mpe kana yandi tala kima ya kukangama mbote ve, kisika ti ya lendaka kubwa mpe kupasuka, to kima nyonso yina lendaka nata kubeba; yandi ke tula ve kidimbu na ditoma yina tii ntangu ditoma yina ke vwanda ya kukangama mbote-mbote, tii ntangu yawu nyonso ke vwanda ya kukangama mbote mpe ke vwanda ya kuyidama mbote-mbote, ti kuningana ya nzyetolo ke bebisa ve kima yina kele na kati.

50 Ya kele samu na yina mingi ve ya beto kele ya kutula kidimbu; beto kele ya kukangama mbote-mbote ve na yina me tala mambu. Ntangu Mfumu ya kutala ke luta, samu na kutala luzingu ya beno, samu na kumona kana beno kele ve

kaka mwa ya kukangama mbote ve na yina me tala mambu, mwa ya kukangama mbote ve na yina me tala luzingu ya beno ya bisambu, mwa ya kukangama mbote ve na yina me tala kudasuka yina, mwa ya kukangama mbote ve na yina me tala ludimi yina, ke zonzaka na yina me tala bayankaka, ata mbala mosi ve ti Yandi ke tula kidimbu na ditoma. Mwa bifu ya mvindu, mwa bima ya yimbi, mwa dibanza ya mambu ya buzoba, Yandi ke lenda ve na kutula kidimbu na ditoma.

Kasi ntangu Yandi ke tala nyonso na kisika ya yawu, Mfumu ya kutala, kuna Yandi ke tula yawu kidimbu. Ti muntu meka ve na kufungula kidimbu yina tii ditoma yina ke kuma na kisika ya yawu ya kusuka samu na kisika yina yawu kutulamaka kidimbu! Yawu yayi. “Benoni simba ve bantu ya Munu ya kukusa; benoni talisa ve mpasi bapofete ya Munu. Samu ti mu ke tuba na beno, ya me lunga na beno ti ba kanga ditadi ya nene na laka ya beno, mpe ti ba losa beno na yisi ya mubu, na kisika ya kusosa kubwisa to kuningisa ata mwa bayayi yina me tulama kidimbu.” Benoni me mona yinki ya zola kutuba?

⁵¹ Ya kele yina Mpeve-Santu kele. Yawu kele kivuvu ya beno. Yawu kele nkebolo ya beno. Yawu kele mbandi ya beno. Yawu kele kidimbu ya beno. Yawu kele kidimbu ya beno, yina ke tuba, “Mu kele na nzila ya Mazulu. Mu ke kipe ve yina dyabulu ke tuba! Mu ke na nzila ya Mazulu. Samu na yinki? Yandi me tula munu kidimbu. Yandi pesaka munu Yawu. Yandi me kangaka munu na kati ya Kimfumu ya Yandi, mpe mu kele na nzila na Nkembo! Ti mipepe kubula, ti Satana kusala yina yandi zola. Nzambi me tula munu kidimbu tii kilumbu ya munu ya mpulusu.” Amen! Ya kele yina Mpeve-Santu kele. Oh, benoni fwana sosa Yawu. Mu lendaka landila nzila ya munu ve kukondwa Yawu. Beto lenda tuba mingi kuna, kieleka kasi benoni zaba yina mu ke na kuzonzila.

⁵² Ntangu yayi, beto baka mpe, Jean 14, mwa minuti fyoti. Mu zola kaka Ndinga! Yawu kele Kieleka.

⁵³ Ntangu yayi, Mpeve ya Nzambi, Mpeve-Santu, yinki kele Mpeve-Santu? Yawu kele Mpeve ya Klisto na kati ya beno. Ntangu yayi, ntete beto tanga, mu zola kaka kupesa mwa mulabu na bampova awa. Yinki kele Mpeve-Santu? Yawu kele kidimbu. Yinki kele Mpeve-Santu? Yawu kele ngwisani. Yinki kele Mpeve-Santu? Yawu kele kidimbu. Na yina yinki kele Mpeve-Santu? Yawu kele. . . Mpeve ya Yesu Klisto na kati ya beno. Benoni me mona? “Ntangu fyoti,” tubaka Yesu, “mpe yinza ke mona Munu dyaka ve; kasi benoni ke mona Munu, samu ti Mu ke vwanda na benoni, mpe na kati ya benoni, tii nsuka ya yinza.” Mpeve ya Nzambi na kati ya Dibuuundu ya Yandi!

⁵⁴ Samu na kusala yinki? Samu na yinki Yandi sala yawu? Yayi kele ndambu ya dilongi ya mbasi na nkokila. Kasi na yinki Yandi salaka yawu? Samu na yinki Yandi salaka yawu, samu na yinki

Mpeve-Santu. . . Yinki, na yinki Yandi kwizaka? Samu na yinki Yandi kwizaka na kati ya beno, samu na yinki Yandi kwizaka na kati ya munu? Ya vwandaka samu na kulandila bisalu ya Nzambi.

⁵⁵ “Mu ke salaka ntangu nyonso yina ke sepelisaka Tata ya Munu. Mu me kwiza ve samu na kusala luzolo ya Munu mosi, kasi Tata yina me fidisa Munu. Mpe Tata yina me fidisa Munu kele na Munu; mpe mutindu Tata ya Munu me fidisa Munu, Munu mpe me fidisa beno.” Oh, la la! Tata yina fidisaka Yandi, vwandaka na kati ya Yandi. Tata yina fidisaka Yesu kwizaka na kati ya Yandi, vwandaka sala na nzila ya Yandi.

Yesu yina me fidisa beno, ke tambula na beno mpe kele na kati ya beno. Mpe kana Mpeve yina, zingaka na kati ya Yesu Klisto, salaka Yandi sala mpe kusala mutindu Yandi salaka, beno ke kuzwa dibanza mosi ya nene mutindu Yawu ke sala ntangu Yawu kele na kati ya beno, samu ti Luzingu yango lenda kusoba ve. Yawu ke katuka nzutu samu na nzutu yankaka, kasi Yawu lenda ve kusoba luzingu ya Yawu, samu ti Yawu kele Nzambi.

⁵⁶ Ntangu yayi na Jean 14, beto tanga kaka mwa fyoti, na kubandaka na nzila ya 10.

Nge ke kwikila . . . ti mu kele na Tata, mpe Tata na kati ya munu? bisalu . . . ba ndinga yina mu ke zonzaka na nge ke katukaka na munu mosi ve: kasi Tata yina ke zingaka na kati ya munu, yandi ke salaka bisalu.

Beno banza na yawu ntangu yayi.

Beno kwikila munu ti mu kele na kati ya Tata, mpe Tata na kati ya munu: to ve beno kwikila kwandi munu na bisalu yina mu me sala.

Ya kieleka, ya kieleka, mu ke na kutubila beno, Yandi yina ke kwikila na munu, ke sala bisalu yina mu me sala mpe; mpe ke sala bisalu ya kulutula nene; samu ti mu ke na kukwenda na Tata ya munu.

Beno me mona ve? Beno me mona mutindu Yandi tubaka kuna? Ntangu yayi beno tala mbote yayi, kisika beto ke na kukuma. Mu ke tanga kaka mwa fyoti ntama. Beto ke tanga na kutala tii nzila ya 20. “Mpe nyonso yina beno ke lomba na . . .” Beto mona, mu vwanda . . . Yinga. Uh-huh. Kieleka.

Nyonso yina beno ke lomba na nkumbu ya munu, mu ke sala yawu, samu ti Tata kuzwa nkembo na kati ya Mwana.

Kana beno ke lomba kima na nkumbu ya munu, mu ke sala yawu.

Kana beno zola munu, beno ke kangama na misiku ya munu.

Mpe mu ke lomba na Tata, (ntangu yayi beno tala mbote) na kufidisa beno Kisadisi yankaka, yina ke vwanda na beno ntangu nyonso;

Mpe Mpeve ya kieleka; yina bantu ya yinza lenda kuyamba ve, samu ti bawu lenda kutala yandi ve, mpe kuzaba yandi ve: kasi beno zaba yandi; samu ti yandi ke zingaka na beno, mpe ke vwanda na kati ya beno.

57 Na yina nani kele Mpeve yango? Yinki kele Mpeve-Santu? Yawu kele Klisto na kati ya beno. Kisadisi, ya kele Mpeve-Santu. “Mpe ntangu Kisadisi ke kwiza, Yandi ke sala bima mosi yina Mu salaka na yina Kisadisi kele na kati ya Munu. Mu ke sambila Tata, mpe Yandi ke pesa beno Kisadisi yayi. Beno zaba Kisadisi. Yinza zaba ve Yandi, ata mbala mosi ve ke zaba. Kasi beno zaba Yandi samu ti Yandi ke zinga ntangu yayi na beno,” Yesu ke na kuzonzaka, “kasi Yandi ke vwanda na kati ya beno.” Beno tala, yina kele Kisadisi, “ke vwanda na kati ya beno.”

Mu ke bika beno bansaana ve: Mu ke kwiza na beno.

“Mu ve. . .” Ntangu yayi, yina kele Kisadisi, Klisto. Yina kele yina Mpeve-Santu kele, ya kele Klisto.

Dyaka ntangu fyoti, mpe yinza ke mona dyaka munu ve; kasi beno ke mona munu: samu ti mu kele moyo, beno. . . moyo mpe.

58 Oh, beto lenda landila mpe kulandila; kasi, ya kele samu na kutuba. Yinki Yandi kele? Yandi kele kidimbu. Yandi kele kidimbu. Yandi kele Kisadisi. Beno nyonso me mona nani Yandi kele? Nkuna ya Abraham ke byadila Yawu.

59 Ntangu yayi beto tala dyaka yina. . .yinki dyaka Kisadisi kele. Bika beto baka ya Ntete ya Jean 16:7, kumona kana Yandi kele ve Avoka, mpe. Beno zaba yinki avoka kele, muntu yina ke nwanilaka dyambu. Beto kele na Avoka. Beto zaba yawu. Ya Ntete ya Jean kapu 16. . . Oh, beno vingila fyoti, beno lemvočila munu. Santu Jean, ya kele, 16:7. Beno lemvočila. Kieleka beno lemvočila munu na kutuba yawu. Mu me tanga yawu yimbi na ya munu. . . kele 16:7.

Ya kieleka mu ke na kutubila beno; Ya ke mbote mingi na beno ti Mu kwenda: samu ti kana Mu kwenda ve, Kisadisi ke kwiza na beno ve; kasi kana Mu kwenda, Mu ke fidisa beno yandi.

Mpe ntangu yandi ke kwiza, yandi ke talisa bantu ya yinza ti bawu vunamaka na yina me tadila masumu, mambu ya kusungama, mpe ya lufundusu:

Ya masumu, samu ti bawu kwikilaka na munu ve;

Ya kusungama, samu ti mu ke kwenda na Tata, mpe beno ke mona munu dyaka ve;

Ya lufundusu, samu ti yandi me fundisa mfumu ya yinza yayi.

⁶⁰ Oh! Ntangu yayi, Avoka, kele na—na ya Ntete ya Jean 2:12. Ntangu yayi beto tanga yawu, kaka minuti mosi, ya Ntete ya Jean 2:12. Mu ke lomba lemvo ya beno, ya Ntete ya Jean . . . 1 mpe 2, ya kele. Mu kele na yawu ya kusonika awa, ya Ntete ya Jean 2:1 na 2.

Bana ya munu, mu ke na kusonikina beno mambu yayi, samu ti beno sala ve disumu. Kasi kana muntu sala disumu, beto kele na avoka na ntuala ya Tata, Yesu Klisto yina kele ya kudedama:

Nani kele Avoka? Yesu Klisto ya kudedama.

Mpe yandi ndimaka—yandi ndimaka na kufwa mutindu munkayulu samu na masumu ya beto: kaka ve samu na masumu ya beto, kasi mpe masumu ya yinza muvimba.

⁶¹ Yinki kele Mpeve-Santu? Yawu kele Avoka. Yinki ke salaka . . . Yinki kele Avoka? Yinki Yawu ke salaka? Yina ke nwanilaka dyambu. Yawu ke talaka kyadi. Yawu, Yawu ke bakaka kisika ya beno. Yawu, Yawu ke salaka bima yina beno lenda ve kusala. Yawu, Yawu ndimaka—Yawu ndimaka na kufwa mutindu munkayulu samu na masumu ya beto. Yawu kele ludedomo ya beno. Yawu kele kubeluka ya beno. Yawu kele Luzingu ya beno. Yawu kele mvumbukulu ya beno ya lufwa. Yawu kele nyonso yina Nzambi me kuzwa samu na beno. Yandi kele Avoka.

⁶² Beto lenda kota na bufyoti-fyoti kuna mpe kutiamuna yawu, kumona mutindu Yawu—Yawu ke sambidila samu na bantangu ya kukondwa kuzaba ya beto. Bantangu yankaka ntangu . . . beto kele na Mpeve-Santu, beto ke sala disakuba kukondwa kuzaba. Mpeve-Santu kele kuna samu na kuzonzila beto. Yandi kele Avoka ya beto. Yandi ke baka kisika ya beto . . . Yandi kele Nzongi ya beto. Yandi ke telama kuna mpe ke zonga samu na beto. Beto ke zonga ve samu na beto mosi, samu ti Mpeve-Santu na kati ya beto ke zonga samu na beto. Mpeve-Santu ke pesa mambu, bambala yankaka na bampova beno lenda bakula ve, mpe Yandi ke sambidilaka samu na beto. Yawu yina Mpeve-Santu kele.

⁶³ Ntangu mu ke kota na kima, mu—mu ke tambula mutindu mwa mwana; beno ke tambula mutindu mwana ya fioti. Beto, beto ke na kutambula na kati ya mpimpa ya yinza ya kufuluka na bambeni, ya kufuluka na disumu, ya kufuluka na mitambu, ya kufuluka na nyonso.

Beno ke tuba, “Oh, mu kele na boma. Mu kele na boma ya kubaka luzingu ya Muklisto. Mu, mu kele na boma na kusala yayi. Mu kele na boma mu ke sala yayi.”

Kuvwanda na boma ve. Beto kele na Avoka. Amen. Oh, Yandi ke sadisaka beto. Yandi kele na kati ya beto, mpe Yandi ke salaka balusambulu samu na beto. Mpeve-Santu, ntangu nyonso, ntangu nyonso ke nwanilaka beto, ntangu nyonso. Yandi kele Avoka ya beto. Oh, mutindu beto ke tonda Nzambi samu na yawu!

⁶⁴ Kidimbu, kidimbu mosi, Mpeve ya Luzingu, Nzambi ya Mazulu, Kisadisi, Luzingu, Avoka. Nani Yandi kele? Oh, la la! Beto lenda landila bangunga na yawu.

⁶⁵ Ntangu yayi beto ke baluka kaka mwa minuti. Ntangu yayi beto ke lomba awa . . .

Silaka beno na bilumbu ya nsuka! Avoka yayi, kinyemo, nsilulu, nyonso yina beto vwanda me zonzila na yina me tala Yandi na nkokila yayi, na bambala mafunda kumi kuluta, Yawu vwandaka nsilulu samu na beto na kilumbu ya nsuka.

Bawu kuzwaka Yawu ve na kilumbu yina. Bawu kuzwaka kaka kidimbu na nzutu ya bawu, mutindu sinsu mpe kidimbu, bawu na kukwikilaka ti Yawu vwandaka kwiza, mpe bawu kutambulaka na kivudi ya musiku. Na yina, bawu kuzengisaka bubakala na nzutu.

⁶⁶ Bubu yayi beto ke na kutambula ve na kivudi ya musiku. Beto ke na kutambula na ngolo ya mvumbukulu ya lufwa. Beto ke na kutambula na ngolo ya Mpeve, Yina kele kidimbu ya beto ya kieleka, Avoka ya beto ya kieleka, Kisadisi ya beto ya kieleka, kidimbu ya beto ya kieleka ti beto me butuka na Zulu; bantu ya luswaswanu, bantu ya ngitukulu, bayina ke na kusala mambu yina ke yitukisa, ba ke baka Nzambi na Ndinga ya Yandi, ba ke bokila nyonso yankaka yimbi. Ndinga ya Nzambi kele kieleka. Yina kele . . . Oh, la la! Yina kele yina Mpeve-Santu kele.

⁶⁷ Beno zola Yawu? Beno ke zola kuzwa Yawu? Beto mona kana Yawu vwandaka ya kusila.

Ntangu yayi beto vutuka na Ésaïe, na Buku ya Ésaïe. Beto baka kapu 28 ya Ésaïe. Ntangu yayi beto ke baka Ésaïe 28, mpe beto ke banda na . . . Beto baka nzila ya 8, samu na kumona yinki Ésaïe tubaka, bankama sambwadi na kumi na zole ya bamvula ntete Yawu kusalama.

⁶⁸ Beto lenda tuba mingi na yina me tala yayi, kuvutuka, tii na ntonono, kasi beto ke banda kaka awa mpe kumona kana Yawu kusilamaka na Dibuundu. Na wapi kilumbu ti Yawu zolaka kusalama? Na bilumbu ya nsuka, ntangu kubeba ke vwanda. Ntangu yayi beno bambuka moyo, mpova kele na mingi, “bilumbu,” bilumbu zole ya nsuka, bamvula mafunda zole ya nsuka.

Ntangu yayi, nzila ya 8 ntangu yayi.

Nyonso, *bamesa nyonso kele ya kufuluka na... mvindu, na yawu ya kele dyaka ve* na kisika ya vwanda na bunkete.

⁶⁹ Beno sosa bisika nyonso bubu yayi samu na kuzwa yawu. Beno tala bisika nyonso mpe beno mona kana beto kele na kilumbu yango. “Bamesa nyonso!” Oh, ba ke kwenda na Madia ya Mfumu, mpe kima ya ntete, na kitezo ya bima ya yinza, ba ke baka kitini ya dimpa ya mpembe to dimpa ya kukawuka ya kutula mungwa, mpe ke buka yawu bitini-bitini mpe ke sala mbundana. Na yina, ya zola vwanda ya kusala na maboko ya muntu yina kele na Mpeve-Santu, mpe na dimpa yina ba me funisa ve. Klisto kele kukondwa mvindu mpe ya kukondwa kusumuka, mpe yina ke monikisa Yandi.

⁷⁰ Kima yankaka, ba ke pesa yawu na bantu yina ke kunwaka, ke vunaka, ke yibaka, ke kunwaka tabaka, ke kudyaka tabaka, (fiou!) kima nyonso, kana bawu vwanda kaka bantu ya dibuundu. Ntama na kuvwanda yawu! Kana muntu baka yawu ntangu beto ke kudya yayi awa, yandi ke na kupema mpe ke na kunwa kitumbu samu na yandi mosi, na kuzabaka ve ti ya kele Nzutu ya Mfumu. Kana yandi ke zinga luzingu yango ve, yandi vwanda ntama na yawu.

Mpe kana beno baka yawu ve, ya ke lakisa ti konsiansi ya beno mosi zaba dyambu. “Yandi yina ke kudya ve, ke na kisika ve na Munu,” Yesu tubaka.

⁷¹ Kasi bamesa nyonso ya Mfumu me fuluka na mvindu. Ya kele na kisika mosi ve ya kukondwa mvindu. Beno kuwa, kana ya kele ve kizizi ya bubu yayi!

*Na nani yandi ke... nani yandi ke longisa ndwenga?
mpe na nani yandi ke pesa... bakula malongi?...*

*... nani ke bakula ndwenga?... nani yandi ke lenda
yandi ke sala kubakula malongi?...*

“Mbote, nkembo na Nzambi, mu kele Presbytérien. Mu kele Méthodiste. Mu kele muntu ya Pantekote. Mu kele Nazaréen. Mu kele Pèlerin de la Sainteté.” Yina zola kutuba kima mosi ve samu na Nzambi; kaka mesa yankaka.

... nani mu ke sala kuzaba malongi?...

⁷² Wapi mutindu ya malongi; ya ba-Méthodiste, ya ba-Baptiste, ya ba-Presbytérien, ya bantu ya Pentecote? Malongi ya Biblia!

... nani mu ke sala kuzaba malongi?...

⁷³ Wapi mutindu beno ke zaba ntangu beno me kuzwa Yawu? Beto ke tala yawu Kilumbu ya tanu na nkokila. Beno me mona?

*... nani mu ke sala kuzaba malongi? (ntangu yayi
beno tala mbote) bayina me bika miliki, mpe me bika
mabele.*

⁷⁴ Mwa ba-bébé ke tuba, “Mbote, mu ke kwendaka na dibuundu, mama ya munu vwandaka muntu ya dibuundu yayi.” Mu kele na kima ve na yina, mpangi ya munu ya luzolo. Mpe mu zaba ti yayi ke na kukangama na bande. Ya kele nyonso ya kulunga, na kuvwanda muntu ya dibuundu ya mama. Kasi, beno kuwa, mama tambulaka na nsemo mosi, beno ke na kutambula na yankaka.

⁷⁵ Luther tambulaka na nsemo mosi; Wesley tambulaka na yankaka. Wesley tambulaka na nsemo mosi; bantu ya Pentecote tambulaka na yankaka. Kasi beto ke na kutambula na ya kulutila na kilumbu yina. Mpe kana ya kele na nsungi yankaka, yawu ke lutila beto.

⁷⁶ Kuna na bilumbu ya ntama, ntangu kima vwandaka nene, nene mingi, Luther longaka mvedolo na nzila ya lukwikilu. Yina vwandaka kaka samu na kunata bantu kukatuka Katolika na kukota na bu-Protestantisme, kubundana pene-pene ya Ndinga. Mvedolo na lukwikilu, yina vwandaka mutindu ya kitezo ya nene mingi. Ata mbala mosi ve ti bawu katukaka na yawu.

⁷⁷ Na manima me kwiza reveil yankaka ya John Wesley. Yawu me ningisa bawu kuna, mpe yandi me luta na kusantisama, kuzinga luzingu ya mbote, ya kukondwa mvindu, ya busantu, ya kusantisama na Ndinga ya Nzambi, ke pesa kyese na ntima ya beno. Yina bwisisaka malongi mingi ya Luther.

⁷⁸ Kuna me kwiza Pentecote na mbotika ya Mpeve-Santu, mpe me kumisa dyaka yawu fyoti, na kuzwaka Mpeve-Santu. Ya kele kieleka.

Mpe awa yina me banda na kukuma fyoti. Mpe makabu, mpe kuvutula, mpe Mpeve ya Nzambi me kwiza, na muvimba ya bidimbu mpe bimangu, na kati ya Dibuundu, mpe me ningisa Pentecote. Yinki ya kele? Beto me belama mingi na Nkwizulu ya Mfumu Yesu, ti Mpeve ya kieleka yina vwandaka na kati ya Yandi ke na kusalaka na kati ya Dibuundu, ke na kusala bima kaka mutindu mosi na yina Yandi salaka ntangu Yandi vwandaka awa na zulu ya ntoto. Ata mbala mosi ve ti ya me salamaka kisika, katuka bilumbu ya bantumwa tii bubu yayi.

Samu na yinki? Beno me mona, ya kele nene; me kuma fyoti, me kuma fyoti, me kuma fyoti. Yinki ya kele? Kaka mutindu diboko ya beno ke na kubelamaka na kinsinsya ya yawu; dyabulu, dyabulu, dyabulu. Kasi yinki ya kele? Ya kele kifwani. Yinki vwandaka Luther? Kifwani ya Klisto. Yinki vwandaka Wesley? Kifwani ya Klisto.

⁷⁹ Beno tala, nsungi ya Billy Sunday me suka kaka. Kilumbu yankaka yina, kiboba Docteur Whitney, yina longaka kaka awa na chaire yayi, muntu ya nsuka ya lukolo ya ntama, yandi kufwaka, na ziunga ya bamvula makumi yivwa, mu banza. Billy Sunday vwandaka muntu ya reveil ya mabuundu ya nkumbu na kilumbu ya yandi. Yandi vwandaka kwenda ve maboko ya

kufwa; vwanda telama kuna mpe vwanda kuboka, “Beno ba-Méthodiste nyonso beno kwiza na nzila ya sciure, milongi mpe beno nyonso! Beno ba-Baptiste nyonso beno kwiza na nzila ya sciure! Beno ba-Presbytérien!” Yandi vwandaka kwenda ve maboko ya kufwa. Yandi vwandaka Billy Graham ya kilumbu yina.

⁸⁰ Beno tala. Mpe kuna, na ntangu mosi yina dibuundu ya nkumbu vwanda kuzwa reveil ya bawu, yinki kusalamaka? Nsangu ya mbote ya Kulunga vwanda kuzwa reveil. Kuna me kwiza bampangi ya Bosworth, Smith Wigglesworth, mpe Mulongisi Price, Aimee McPherson, bawu nyonso yina.

Beno tala, Smith Wigglesworth kufwaka mpimpa mosi. Mulongisi Price kufwaka suka yina vwandaka landa. Na kati-kati ya bangunga makumi zole na yiya mu vwandaka na kibanzala.

⁸¹ Ntangu yayi nsuka ya munu ke na kukwiza. Beno tala . . . Beno ke na kuwa mingi ve na Billy Graham. Beno ke na kuwa mingi ve na Oral Roberts. Mu ke na kumona balukutakanu ya munu kusala dyaka ve makelele mingi. Yinki kele dyambu? Beto kele na nsuka, nsungi yankaka.

⁸² Wapi mutindu Billy Sunday kwizaka, mpe bayankaka? Ba kwizaka na manima kaka ya reveil ya nene ya Moody. Na wapi ntangu Moody kwizaka? Kaka na manima ya reveil ya Knox. Na wapi ntangu Knox kwizaka? Kaka na manima ya reveil ya Finney. Finney na manima ya Calvin, Calvin na manima . . . Na yawu, Wesley, mpe Wesley na manima ya Luther. Mutindu kaka yina nzila nyonso ya nsungi. Na yina kaka reveil mosi ke manisa, Nzambi ke telemisa yankaka mpe ke losa Nsemo ya kulutilla; ke landila kaka kukwenda mutindu yina.

⁸³ Ntangu yayi beto kele na nsuka ya ntangu yayi. Muntu nyonso ke talaka na nsuka ya kisika ya yandi ya kuvukana samu na Nkwizulu ya Klisto, kasi ba vwandaka na mingi ya kuvingila; kuvutuka ya ba-Juif, ba-soucoupe volante na mazulu, bima nyonso yina beto ke mona bubu yayi. Kasi beto kele na nsuka. Beto kele awa ntangu yayi. Ba zabaka ti Dibuundu zolaka kuzwa Ngolo yina zolaka sala na kati ya Dibuundu bisalu mutindu mosi ya Klisto, samu ti mutindu kinsinsya ke talanaka mbote-mbote, mpe yawu ke pesa kifwani ya mbote.

⁸⁴ Beno tala kinsinsya. Ntama beno kele na kinsinsya, mbote ve kifwani ke talana. Na manima ya ntangu fyoti, kinsinsya ke belama mingi-mingi, tii yinti na kinsinsya kele kima mosi.

⁸⁵ Ntangu yayi, Mpeve ya Nzambi kusalaka na nzila ya mvedolo, na Luther; kusantisama, na nzila ya Wesley; mbotika ya Mpeve-Santu, na nzila ya Pantekote; mpe awa Yawu kele na kilumbu ya nsuka, ke na kulungisama mpe ke na kusalaka bima kaka mosi na yina Yawu kusalaka ntangu Yawu vwandaka na kati ya Klisto. Yinki ya kele? Dibuundu na Klisto me kuma Mosi.

Mpe kaka na ntangu yina Bawu ke vukana kintwadi, na kitini ya nsuka yina, Kento ke sabuka zulu, na kubokaka. Wesley ke telama, Luther, mpe bayankaka nyonso ya bilumbu ya ntama yango kuna, “yandi yina kele ya ntete ke vwanda ya nsuka, yandi yina kele ya nsuka ke vwanda ya ntete,” mpe kuna ke kwiza mvumbukulu ya lufwa.

⁸⁶ Beto kele na nsuka ya ntangu. Beno kuwa, ya kele yina Mpeve-Santu ke salaka. Mpeve-Santu, na nzila ya mvedolo, beno me mona, kaka kinsinsya ya nsemo ya Yawu; Mpeve-Santu, na nzila ya kusantisama, mwa kinsinsya ya mbote ya Yawu; Mpeve-Santu, na nzila ya mbotika ya Yawu, kinsinsya ya mbote; ntangu yayi Mpeve-Santu, na nzila ya kuvutula ya Muntu ya Yawu ya kieleka yina vwandaka awa, na kusalaka bidimbu mpe bimangu mutindu Yandi salaka na mbandukulu. Fiu! Nkembo! Beno ke bokila munu “exalté,” na mutindu nyonso, beno ke sala mbote na kubanda ntangu yayi.

⁸⁷ Beno kuwa, bankundi, beno kuwa yayi.

. . . bamesa nyonso kele ya kifuluka na bilusu . . . ya kele na kisika ve ya kutsya.

Nani yandi ke longisa ndwenga? . . . na nani yandi ke sala kuzaba, kubakula malongi? bayina me bika miliki, mpe me bika mabene.

Mwa ba-bébé ve; ba-bébé ya ba-Presbytérien, ba-bébé ya ba-Méthodiste, ba-bébé ya bantu ya Pantekote, ba-bébé ya ba-Luthérien, ba-bébé ya ba-Nazaréen. Yandi ke na kusosa muntu yina zola kubika mabene mpe kudya mwa musuni ya ngolo. Yawu yayi ke na kwiza:

Samu ti ya kele dilongi na zulu ya dilongi, . . . na zulu ya dilongi; musiku na zulu ya musiku, . . . na zulu ya musiku; awa ndambu, mpe kuna ndambu:

Samu ti na bikoba ya kutekita mpe bandinga yankaka ti mu ke zonza na bantu yayi.

Na yina yandi tubaka, Yayi kele kupema beno bika kupema yina me lemba; mpe yayi kele kisika ya kupema: kasi ba me zola kuwa ve.

⁸⁸ Mpeve-Santu, kana ya kele ve kaka mutindu Yawu kwizaka na Kilumbu ya Pantekote, kupesaka profesi bankama sambwadi na kumi zole ya bamvula ntete Yawu kusalama! Awa Yawu yayi na Kilumbu ya Pantekote, me kwiza kaka mutindu ya kulunga.

⁸⁹ Muntu tubaka, “Zitisa kilumbu ya saba.” Mu ke na kumangaka ve to ke na kubakaka na bumpamba ve dibuundu to lukwikilu ya muntu. Kasi kutuba, “Kilumbu ya saba, saba ya Nzambi vwandaka kilumbu ya kupema.”

Yawu yayi kilumbu ya kupema. “Yayi kele kupema,” Yandi tubaka, “beno bika kupema yina me lemba.” Yayi kele yawu. Amen! “Ya ke vwanda dilongi na zulu ya dilongi, musiku na

zulu ya musiku.” Yawu yayi kupema. Yinki kele Mpeve-Santu? Kupema. Oh!

Beno kwiza na munu, beno nyonso yina me lemba mpe kele na bizitu ya dema, mpe mu ke pesa beno kupema.

90 Yinki Yandi kele? Muntu yina ke kwizaka na kati ya beno, ke pesaka beno ngemba; kidimbu ya beno, Kisadisi ya beno; ke bomba, na kupema, ke tula kidimbu.

91 Yinki mutindu beno kele . . . ? Yawu kele kidimbu; yinza zaba ti kima me salama na beno. Yinki Yawu kele? Yawu kele Kisadisi. Yinki Yawu kele? Kidimbu. Beno kele ya kupema. Beno me kuzwa . . . Yawu kele Avoka ya beno. Kana, beno, kima me salama na beno, ya kele na Kima kuna samu na kunwanila beno mbala mosi, beno me mona, ke na kusalaka balusambulu. Ya kele Mpeve ya Nzambi yina ke na kuzingaka na kati ya Dibuuundu, pesaka profesi ya kulunga yina Yawu zolaka vwanda ntangu Yawu ke kwiza. Yawu ke vwanda kupema ya kukondwa nsuka, ya Seko.

92 Nzambi salaka yinza. Hébreux, kapu ya 4. “Nzambi salaka yinza, mpe pemaka kilumbu ya sambwadi.” Ya kele kieleka.

Kilumbu ya nana vwanda vutuka, na . . . Yandi pesaka yawu na ba-Juif mutindu ngwisani, samu na mwa ntangu. Ya kele kieleka. Kasi bawu ke kwenda mpe ke pema kilumbu mosi; ke vutuka, kilumbu ya ntete ya lumingu, ke banda dyaka, ya malu-malu, kubanda dyaka. Yina kele ve kupema yina Nzambi kuzonzilaka.

Ntangu Nzambi salaka yinza na bilumbu sambanu, ntangu Yandi kwendaka na kupema, Yandi pemaka mbala mosi. Ya kele kieleka. Yina sukisaka yawu. Yandi vutukaka ve na kilumbu ya nana mpe bandaka dyaka.

93 Ya vwandaka kaka kinsinsya. Ntangu yayi, yina vwandaka kifwanusu, mutindu ngonda na mwini; kasi ntangu mwini ke basikaka, beto kele dyaka ve na nsatu ya ngonda. Ntangu yayi beno tala yayi, oh, na Apocalypse 11, “Kento na ngonda na yisi ya makulu ya yandi, mpe mwini na yintu ya yandi.” Oh, beto lenda baka Biblia, katuka page ya ntete tii page ya nsuka, mpe kulakisa beno. Beno me mona?

94 Kasi yinki ya kele? Ntangu, Biblia tubaka na Hébreux kapu ya 4, “Kana Yesu pesaka bawu kilumbu ya kupema, Yandi zolaka zonzila na manima ya yawu; Yandi zolaka zonzila na kilumbu ya kupema.” Na wapi kilumbu Yandi zonzilaka, samu na kupema?

Beno kwiza na munu, beno nyonso yina me lemba mpe kele na bizitu ya dema, mpe mu ke pesa beno kupema.

95 Matthieu kapu ya 11, na nzila ya 22 . . . Beno tala, kuna, beto ke tala yawu ntangu beto ke kwiza na Yandi. “Ya kieleka muntu,” me tuba Hébreux ya 4, “yina me kota na kupema ya Yesu, ke pema na bisalu ya yandi ya yinza, mutindu Nzambi kusalaka na

ya Yandi,” ntangu Yandi salaka yinza, samu na kuvutuka dyaka ve na yawu. Bilumbu yikwa? Bilumbu yikwa beno ke vwanda ya kutula kidimbu na Mpeve-Santu? “Tii kilumbu ya mpulusu.” Beno tala kupema yango, kubomba, Nzonzi, kidimbu, Mvulusi. Oh! Bantangu yankaka mu ke vwandaka kidi-kidi, to bantangu yankaka mu ke vwandaka ya kusakumuna. Oh!

⁹⁶ “Ya kele ya kusila samu na beto, Mpangi Branham? Ya kele na kimbangi na Biblia?”

Mbote mingi, beto kwenda na Joël, beto tala yinki Joël kutubaka samu na Yawu.

Mutindu mu ke na kuvutula matondo samu na Ndinga ya Nzambi ya kusakumuna! Beno zola Yawu? Mu banza ti kana ya vwandaka ve samu na Ndinga, mu zaba ve kisika beto zolaka vwanda. Mbote mingi.

Beto kele na Joël ntangu yayi. Beto ke baka Joël, kapu ya 2 ya Joël, mpe beto ke banda na nzila ya 28. Joël 2:28, bamvula bankama nana ntete nkwizulu ya Klisto, profete na kati ya Kimpeve. Ntangu yayi beno kuwa.

Na manima ya yawu, mu ke tsyamuna mpeve ya munu na zulu ya bantu nyonso; . . . bana ya beno ya babakala mpe ya bakento ke pesa profesi, biboba ya beno ke lota bandosi, mpe bantwenya ya beno ke mona ba-vision.

Mpe dyaka na zulu ya bisadi ya munu mpe na zulu ya musadi ya munu ya kento mu ke tsyamuna yawu na bilumbu yango . . . ke tsyamuna, na bilumbu yango, ya mpeve ya munu.

Mpe mu ke lakisa bimangu na zulu ya mazulu mpe na ntoto, menga, . . . tiya, mpe makunzi ya mulinga.

Mwini ke kituka na ndombi, mpe ngonda na menga, ntete ya nene mpe . . . kilumbu ya mpasi ya MFUMU ke kwiza.

Mpe ya ke salama, kuna muntu nyonso yina ke sambila nkumbu ya MFUMU ke vuuka:

⁹⁷ Ya kele. . . Oh! Yinki? Joël! Beno me tala? Na Actes ya 2, Pierre kubakaka nzila mosi. Yandi tubaka, “Beno bantu ya Israël, beno kuwa munu. Bayayi kele ya kukola ve malafu,” bantu yayi ya kutula kidimbu, ya kubomba, ya kubaluka, ya kutula kidimbu. “Ba kele ya kukola malafu ve, mutindu beno ke na kubanza,” Actes ya 2, “samu ti ya kele ntete ngunga ya yivwa ya suka. Kasi yayi kele yina profete Joël kuzonzaka, tubaka, ‘Na bilumbu ya nsuka mu ke tsyamuna Mpeve ya Munu na zulu ya bantu nyonso.’”

⁹⁸ Yinki Yawu kele, yinki Mpeve-Santu kele? Mbote mingi, ntangu yayi beto tala dyaka, silaka na mikwikidi, tala yinki Yawu kele. Ntangu yayi, Mpeve-Santu yayi, beto ke tala yinki

Yawu kele, na minuti fyoti. Na nani Yawu kusilaka? Na mikwikidi.

Ntangu yayi beto kwenda na Luc, kapu 24 ya Luc, beno kuwa yinki Yesu tubaka na Bampova ya Yandi ya nsuka ntete Yandi katuka ntoto. Luc kapu 24. Mpe na beno bayina ke na kusonikaka yayi ntangu yayi, beno lenda baka yawu, na manima kulonguka yawu mbasi ntangu beno ke kuzwa ntangu mingi. Ntangu yayi, Luc 24:49, beno kuwa Yesu kuzonza. Na nsuka, ntangu Yandi vwanda mata na Nkembo, nzanguka, awa kele Bampova Yandi tubaka na bilandi ya Yandi.

. . . beno tala, mu ke fidisa nsilulu ya Tata ya munu . . .

Silaka yinki? Kidimbu, kidimbu mosi, Kisadisi, mpe bima nyonso yina mu me zonzila, kulutula bambala mafunda.

. . . mu ke fidisa nsilulu ya Tata ya munu na zulu ya beno: . . .

Silaka yinki? “Yina Ésaïe tubaka ke salama, ‘Na bikoba ya kutekita mpe bandinga yankaka ti mu ke zonza na bantu yayi.’ Mu ke fidisa kupema yango na zulu ya beno. Mu ke fidisa yina Joël kuzonzaka, ti, ‘Ya ke salama na bilumbu ya nsuka, me tuba Nzambi, Mu ke tsyamuna Mpeve ya Munu na zulu ya beno.’ Oh, Mu ke fidisa beno, mpe kusala bayinsi nyonso, bantu nyonso, kubanda na Jérusalem. . . Mu ke kotisa nkuna ya Abraham na yisi ya ngwisani yayi. Mu ke tula kinyemo na mosi na mosi ya bawu. Beno me mona, Mu ke tsyamuna Mpeve ya Munu.”

. . . Mu ke fidisa nsilulu ya Tata ya munu na zulu ya beno: kasi beno vwanda, yina zola kutuba, vingila na kati ya mbanza ya Jérusalem, tii ntangu beno ke vwanda ya kulwata ngolo ya mazulu.

⁹⁹ Na yina yinki kele Mpeve-Santu? “Ngolo ya Mazulu!” Ngolo ya eveque ve, ngolo ya dibuundu ve. Kasi, “Ngolo ya Mazulu!”

¹⁰⁰ Wapi mutindu Ngolo yango kwizaka? Na “kukumaka muntu ya dibuundu”? Mu ke losa beno ndefi, na kutuba ti ya kele kieleka. Na “kukumaka muntu ya dibuundu, na kupesanaka mbote na mulongi”? Ve, tata. Ntangu yayi, samu na beno bantu ya Katolika, “na kubasisa ludimi mpe kubaka mbundana ya ntete”? Ve, tata.

¹⁰¹ Yinki mutindu Yawu me kwiza, Ngolo ya Mazulu? Beto tanga mwa ntama. Beto kwenda na Actes 1:8. Ba ke na kuvukanaka kintwadi ntangu yayi. Ntangu yayi ba vwanda zonzila na Yesu awa, ntangu ba vwandaka ya kuvukana kintwadi, mpe tulaka muntu yankaka na kubaka kisika ya Judas. Actes 1:8.

Kasi beno ke kuzwa ngolo, na manima yayi ti Mpeve-Santu me kulumuka na beno: . . .

Yinki? “Beno ke vwanda muntu ya Branham Tabernacle”? Ve. “Beno ke vwanda muntu ya dibuundu ya ba-Méthodiste, ya

dibuundu ya Katolika, ya ba-Presbytérien”? Mutindu yina ve, na kati ya Biblia. Yina kele malongi ya muntu.

“Kasi beno ke kuzwa Ngolo na manima beno me kuma mulongi”? Ve, tata. “Benno ke kuzwa Ngolo na manima beno me kuzwa Licence ya beno ya Lettre”? Ve, tata. “Benno ke ku- . . . kwiza Ngolo na manima beno me kuzwa Doctorat ya beno ya Philosophie”? Ve, tata. “Benno ke kuzwa Ngolo na manima beno me botama na maza”? Ve, tata. “Benno ke kuzwa Ngolo na manima beno me baka kominyo ya ntete”? Ve, tata. Benno me mona, nyonso yina bantu me sala.

¹⁰² Benno kuwa yinki Biblia ke tuba, yinki Yesu tubaka.

. . .beno ke kuzwa ngolo, na manima ti Mpeve-Santu me kulumuka na beno: (yinki kele Mpeve-Santu? Ngolo) na yina, na manima ya yayi, beno ke vwanda bambangi. . . (“Kaka beno kumi na zole, beno ke pesa kimbangi na Jérusalem?”) . . . beno ke vwanda bimbangi ya munu na Jérusalem, . . . Judée, . . . Samarie, mpe na bansuka ya ntoto. (Kuna ata mbala mosi ntete ve ti ba me kuma.)

Mpe na manima yandi me zonza mambu yina, . . . na manima yandi me zonza mambu yina, na yina ba vwanda tala yandi, yandi nangukaka na kati ya zulu mpe kuzwaka. . . na ngaanda ya meso ya bawu.

¹⁰³ Ntangu yayi beno baluka kaka na page yankaka na lweka, beno tala mbote bapofesi yayi kulungisama.

Ntangu kilumbu ya Pantekote kumaka, ba vwandaka na kati mosi. . . ba vwandaka bawu nyonso ntima mosi na kisika mosi.

“Mpe na mbala mosi pasteur me kota mpe. . .”? Kuna mu me katukila nzila, ve? “Na mbala mosi nganga-Nzambi me belama na autel”? Ve.

Na mbala mosi me kwiza makelele. . .

Ve kaka kufwanikisa; Yawu vwandaka kuna, makelele.

“Mulongi vwanda belama na mwelo”? “Nganga-Nzambi bakaka kominyo, yina katukaka na kisika ya santu”? Ve, kima mutindu yina.

. . .me kwiza makelele me katuka na mazulu. . . (Makelele ya makulu ve). . .me kwiza makelele me katuka na mazulu mutindu mupepe ya ngolo (Oh, la la! Fiu! . . .? . . .) . . .mpe fulukaka na yinzo nyonso kisika bawu vwandaka.

¹⁰⁴ Yinki kele Mpeve-Santu? Awa kele kisika bawu ke kuzwa Ngolo. Awa kele kisika bawu zolaka vingila; yawu yayi yina salamaka ntangu bawu salaka yawu. Nyonso ya kupesa na profesi, katuka Genèse nzila nyonso, kubanda na Abraham;

Yawu ke kwiza, mpe mutindu Yawu ke kwiza, mpe bandandu yina ke vwanda. Yinki Yawu kele? Ya kusila na Dibuundu, na mikwikidi.

. . . mpe *fulukaka na yinzo kisika bawu vwandaka.*

Na yina bawu talaka bima mutindu . . . ya tiya, mpe tentamaka na zulu ya mosi na mosi ya bawu.

Mpe bawu nyonso fulukaka na Mpeve-Santu, mpe banda na kuzonza na bandinga ya malu-malu, mutindu Mpeve vwandaka twadisa bawu na kuzonza.

Ntangu yayi beto ke kuma na yawu, Kilumbu ya tanu na nkokila. Beto ke bika kaka yawu kuna, beno me mona.

¹⁰⁵ Wapi mutindu Yawu kele? Yawu kele nsilulu samu na Dibuundu, kieleka nsilulu. Mbote mingi.

¹⁰⁶ Ntangu yayi, ntangu yayi beto ke tala, na manima ti bawu me fuluka, ba vwandaka ya kutula kidimbu bilumbu yikwa? [Dibuundu me tuba, “Tii kilumbu ya mpulusu.”—Mu.]

Bantu yikwa na kati awa kele na Mpeve-Santu? Ti beto mona maboko ya beno. Mingi kele na Mpeve-Santu kulutila bayina me kondwa. Beto zola beno kuvwanda mosi ya beto, mpangi ya bakala, mpangi ya kento. Ntangu beno ke bakula yinki Yawu kele, Ya kele. . . Yawu kele Mpeve ya Nzambi yina ke na kuzinga na kati ya beno, samu na kusala bisalu ya Nzambi.

Ntangu Nzambi ke fidisaka mosi ya Mpeve ya Yandi na kati ya mosi ya bisadi ya Yandi, mosi ya baprofete ya Yandi, mosi na mosi ya Milongisi ya Yandi, mosi na mosi ya bantumwa ya Yandi, ntangu nyonso yinza vwandaka manga bawu. Ba vwanda tala bawu bilawu, na konso nsungi ya vwandaka. Mpe ntangu Paul kutelamaka na ntwala ya Agrippa, yandi tubaka, “Na mutindu ba ke bokilaka *hérésie*. . .” Yinki kele *hérésie*? “Bulawu.” “Na mutindu yina bawu ke bokilaka bulawu, nkonga ya bantu ya kulawuka, ya kele mutindu mu ke sambilaka Nzambi ya batata ya beto.” Mu kele na kyese mingi ti mu lenda tuba mu kele mosi ya bawu. Yinga, tata. Ya kele kieleka. Mu kele na kyese mingi ti mu lenda tuba mu kele mosi ya bawu.

¹⁰⁷ Ntangu yayi, na manima Mpeve-Santu yayi kubwaka na zulu ya bawu, Yawu tulaka luzolo mingi na bawu ti ba vwandaka mosi na nyonso. Ya kele kieleka? Oh, oh, wapi kubundana! Beto ke yimbaka nkunga yango bantangu yankaka, “Oh, wapi kubundana! Oh, wapi kyese ya Kinzambi!” Kaka yina. Ba vwanda kipe ve, ba vwanda kipe ve kana mwini vwanda sema to ve. Ba vwanda lomba ve na kulala na mbeto ya kufuluka na bafololo.

“Ntangu yayi, mu ke kuzwa Mpeve-Santu,” ke tuba bantu yankaka na munu, “Tata Branham, kana nge ke singisa munu ti mu ke kuma muntu ya mafuku ya mbongo, kana nge ke singisa munu ti mu ke tala mabulu ya pitiloyi, mpe kana mu ke tala

bisika ya wolo, mpe mu—mu . . .” Beno me mona, bantu ke longa yawu, mpe bawu ke longaka luvunu. Nzambi silaka bima yina ve.

¹⁰⁸ Muntu yina me kuzwaka Mpeve-Santu ke kipe ve kana yandi lomba dimpa, to ve. Ya ke sala ata luswaswanu samu na yandi. Yandi ke ke kivangu yina ke na nzila ya Mazulu. Yandi ke ve . . . Yandi ke na bisimbididi awa ve, ata fyoti. Ya ke ke kieleka. Yandi ke kipe ve. Ata, nyonso yina, ke kuma. Ti bawu tonga, seka. Kuzimbisa kimfumu ya beno, yinki ya ke sala beno? Beno ke na nzila ya beno na Nkembo! Alleluia! Meso ya beno ke na zulu ya Klisto, mpe beno ke na nzila ya beno. Beno ke kipe ve yina yinza ke tuba.

Ya ke ke yina Mpeve-Santu ke ke. Yawu ke ke Ngolo, Yawu ke ke kidimbu, Yawu ke ke Kisadisi, Yawu ke ke Avoka, Yawu ke ke kidimbu. Oh, la la! Yawu ke ke kivuvu ti Nzambi me yamba beno.

Mu me baka ngunga yikwa? Ya me bikana munu baminuti nana. Mbote. Bika mu . . . Mu ke na Masonuku mingi awa. Mu banza ve ti mu lenda vukisa yawu, kasi beto ke—beto ke meka nyonso ya beto.

¹⁰⁹ Ntangu yayi, na manima muntu me fuluka na Mpeve-Santu, ya lenda salama ti bakutalisa mpasi mpe nyonso kunata yandi na kuvutuka manima mpe . . . Ntangu yayi, yandi ke zimbisa ve, yandi ke dyaka mwana ya bakala Nzambi, ntangu nyonso yandi ke vwanda, samu ti beno ke ke ya kutula kidimbu bilumbu yikwa? [Dibuundu me tuba, “Tii kilumbu ya mpulusu.”—Mu.] Ya ke ke kieleka. Ya ke ke yina Biblia me tuba.

¹¹⁰ ntangu yayi, na manima ya kubulama ya bilandi, ba vwezaka bawu, sekaka bawu, mpe nyonso, ba banzaka ya vwandaka ntangu ya kuvutuka kintwadi mwa ntangu fyoti. Beto baluka na—na Actes kapu ya 4, mpe kumona ntangu bawu . . . yinki kusalamaka. Ntangu yayi yayi ke ke samu na beno bantu yina ke ke yimeni na Yawu. Actes kapu ya 4.

Ntangu yayi, Pierre na Jean me bulama, me tulama na boloko, samu na kubeluka, na kuzwaka lukutakanu ya kubelusa na ngaanda na mwelo ya dibuundu. Bantu yikwa zaba yawu? Ya vwandaka na muntu mosi ya kulala kuna, mutindu kikata ya makulu. Yandi vwanda lenda ve kutambula; yandi vwandaka mutindu yina bamvula makumi yiya. Mpe Pierre lutaka kuna. Mpe yandi tubaka . . . me nangula kopo ya yandi, samu na kuzwa kima ya kutula na kopo ya yandi, samu na madya.

Mpe Pierre lakisaka ti yandi vwandaka mulongi ya kifuluka na Mpeve-Santu, yandi vwandaka ve na mbongo. Yandi tubaka—yandi tubaka, “Mbongo mpe wolo mu ke ke na yawu ve.” Beno me mona, yandi vwanda kipe yina ve. Kasi yandi vwandaka kivangu yina ke ke na nzila ya Mazulu. Oh, mutindu mu zolaka ti beto kuzwa ntangu samu na kukota na yawu mwa ntangu fyoti kuna, beno me mona. Yandi vwandaka muntu na nzila ya Mazulu.

Yandi vwandaka ya kubomba. Yandi vwandaka na Mpeve. Yandi vwandaka na Ngolo. Yandi belamaka mpe tubaka, “Mbongo mpe wolo kele na munu ve, kasi yina kele na munu mu ke pesa na nge.”

Kukondwa ntembe ti muntu tubaka, “Yinki kele na nge, tata?”

“Mu ke na lukwikilu. Mu ke na kima na kati ya ntima ya munu yina bandaka na kutala bilumbu kumi me luta. Mu vwandaka kuna na kivinga ya zulu, mpe na mbala mosi, bansilulu nyonso yina Nzambi salaka . . . mu tambulaka na Yesu Klisto bamvula tatu na ndambu. Mu kwendaka loba na Yandi, kuna na kunataka mbisi. Mu salaka bima nyonso yina. Mpe mu monaka Yandi kubelusa bimbevo. Mu . . . Yandi landilaka na kutuba na munu, ‘Tata kele na kati ya Munu; kasi ntangu mu ke kwenda, Yandi ke kwiza na kati ya beno.’ Kuna, mu vwanda bakula yawu ve. Kasi Yandi tubaka, ‘Ntangu yayi, mu ke na kuingila ve ti nge bakula yawu.’”

Beno ke na kubakula bima yayi ve; beno baka kaka yawu. Mu ke na kubakula yawu ntete ve. Mpe beno tuba na munu ve ti beno ke na kubakula; samu ti, beno ke na kubakula ve. Beno me mona? Na yawu, mu ke na kubakula Yawu ve, mu lenda bangula Yawu ve; kasi, kima kaka mu zaba, mu kele na Yawu.

“Mbote, mbote,” beno ke tuba, “yina kele ve mayela ya yinza.” Oh, kieleka ya kele.

¹¹¹ Beno tala minda yina. Ntangu Benjamin Franklin bakulaka yawu, yandi tubaka, “Mu me kuzwa yawu.” Yandi zabaka ve yinki yandi kuzwaka, kasi yandi kuzwaka yawu. Mpe mu zola muntu kutuba na munu na nkokila yayi yinki lotiliki kele. Ba zaba ntete ve yinki ya kele, kasi beto kele na yawu. Amen. Ya kele kieleka. Ya kele na muntu ve yina zaba yinki nsula kele. Ba lenda sadila yawu, kusala mwinda na yawu, kusala yawu kunyenga, kusala yawu kusala. Kasi ya kele—ya kele na nzila ya bamasini ti yawu ke basika, bima zole ke tambula kintwadi mutindu *yayi*. Yina ke basisa yawu, mpe ya kele kaka yina bawu zaba. Yawu ke pesa mwinda, mpe ya kele na ngolo na kati ya yawu.

¹¹² Mpe ya kele mutindu Mpeve ya Nzambi. Ntangu beno ke kuzwa kitini mosi, ya kele beno, mpe kitini yankaka kele Nzambi; mpe ti beno sala bawu kutambula kintwadi mutindu *yayi*, ya ke sala kima samu na beno. Ya kele kieleka. Yawu ke pesa Mwinda. Yawu ke pesa Ngolo. Beno zaba ve yinki Yawu kele, mpe ata mbala mosi ve ti beno ke zaba yinki Yawu kele, kasi beno zaba ntangu beno ke na Yawu. Yina kele kima mosi ya kieleka. Mpe Yawu kele samu na beno. Yawu kele ya beno. Yawu kele kivuvu. Ya kele kieleka.

Yinki mwinda *yango* ke lakisa? Ti kivuvu kele. Yawu kele mwinda.

Ntangu yayi beno tala yayi. Ntangu yayi, beno zaba ve yinki Yawu kele.

113 Kasi bantu yayi tubaka, “Mbote,” ba vwandaka...ba tubaka kima mosi yina bawu zabaka, “beto zaba ti ba kele bantu zaba kima ve.” “Bantu ya kulawuka” ya kulutila, beno me mona, mutindu mwa muntu ya Allemagne tubaka ti yandi vwandaka. Beno me mona? Ba tubaka, “Ba kele bantu zaba kima ve mpe me longoka ve. Kasi ba vwanda vwanda na Kilobi yina, Kisadi-mabaya yina kuna, yina ba ke bokilaka Yesu, mu ke tuba na beno, samu ti bawu ke na kusala mutindu mosi ya bima yina Yandi salaka.”

114 Ya kele yina Mpeve-Santu kele, ya kele Yesu kuzinga na kati ya mulobi yina zaba kima ve, kisadi-mabaya, to nyonso yina, mulongi yina zaba kima ve, nyonso yina ya kele. Ya kele muntu yina zola kuvwanda muntu yina zaba ve bima ya yinza, mpe ke bika Yesu kukwiza na kati ya yandi, Mpeve ya Nzambi, kinyemo, Kisadisi. Yandi ke kipe ve kimfumu; kima kaka yandi zola kele Nzambi.

115 Ntangu Nzambi vwandaka bongisa, Yandi tubaka, “Beno Balevite, Mu me bokila beno nyonso mpe me sala beno banganga-Nzambi. Mpe bankundi ya beno nyonso, bayankaka, ya bifumba kumi na zole mpe. . . bifumba kumi na mosi yankaka ke futa beno kikunku ya kumi.”

“Ntangu, beno ke kuzwa nkama na kumi na sambwadi ya balitele ya ba-pomme, beno pesa kumi na tatu ya balitele na Balevite. Ntangu beno ke lutisa mameme ya beno na couloir awa, beno baka dimeme ya kumi. Mu ke kipe ve kana ya kele ya fyoti, to ya nene, ya kuvimba, to ya mawa, yina kele ya Balevite.

“Ntangu yayi, Balevite, ntangu beno ke kuzwa nyonso yayi, na manima beno pesa mpe, kikunku ya kumi, na Mfumu. Beno ke sala munkayulu ya kuningisa, minkayulu ya kunangula, minkayulu nyonso. Beno pesa kikunku kumi na Mfumu.”

116 Yandi tubaka, “Moïse, samu na kitini ya nge, Mu kele ya nge.” Oh, la la! Yandi tubaka, “Mu kele ndambu ya nge ya kufwana.”

Mpe ya kele yina Mpeve-Santu kele samu na Dibuundu bubu yayi. Mbongo mpe wolo mu kele na yawu ve, kasi mu kele na Ndambu ya kufwana. Alleluia! Ndongosolo, na mpasi mu lenda tanga Buku yayi, kasi mu kele na Ndambu ya kufwana. Ya kele mbote. Diplome ya Doctorat, mu ke na yawu ve; Doctorat ya Philosophie to Doctorat ya droit, to nyonso yankaka. Kasi mu kele na kima mosi, Ndambu ya kufwana. Ya kele kitini mu zola. Ya kele kitini yina Nzambi zola ti beno kuzwa. Beno losa bima nyonso yankaka ya ntama yina, kimfumu nyonso mpe nyonso yankaka, mpe beno belama mpe kuzwa Ndambu ya kufwana ya Nzambi.

117 Samu ti, yina beno me kuzwa na ntoto yayi, beno ke bika yawu awa ntangu beno ke kwenda. Kasi kana beno kele na Ndambu ya kufwana yina, Yawu ke nata beno na zulu mutindu kaka kieleka. Beto ntangu nyonso ke na kubaka ba-assurance,

bubu yayi, samu na muntu yina ke zikaka. Beto kuzwa Ndambu ya kufwana ya Nzambi, mpe beto kuzwa Muntu yina ke nataka na Zulu na kisaka ya muntu yina ke zikaka. Beno zaba, bawu nyonso zole ke na kati ya kisalu.

¹¹⁸ Ntangu yayi beto mona.

. . . ba bikaka bawu, ba kwendaka kisika vwandaka bampangi ya bawu, . . .

Ba vutukaka ve na banganga-Nzambi. Beno me mona, yina lakisaka ti bawu vwandaka na Yawu. Ba zolaka vutuka dyaka ve na kima ya ntama, ya madidi, ya misiku yina, ve; kuvutuka mpe kutuba, “Ntangu yayi tala awa yina ba me sala beto!” Ve, ve. Ba vwandaka na bampangi ya bawu. Ya vwandaka kaka na kutala kumi na zole ya bawu kuna, kasi yina vwandaka bampangi ya kulunga, mwa ndambu ya diboko ya bantu.

. . . ba bikaka bawu, . . .

Na manima ba me bula bawu mpe me bangisa bawu, ba tubaka, “Kana beno botika dyaka na Nkumbu ya Yesu!” To, oh, mu zola kutuba . . . Mbote, ya kele kieleka. Beno me mona? “Kana beno longa dyaka na Nkumbu ya Yesu, nyonso yina beno ke sala, beto ke kuzwa beno!”

¹¹⁹ Ba tubaka, “Fiu, ya kele nyonso kubangisa. Beto kwenda kisika bankundi yankaka kele.” Oh, ya kele mutindu ya kusala. Na bumosi ya kele na ngolo. Na bumosi ya kele na ngolo. Ba tubaka, “Beto kwenda kaka kisika bankundi yankaka kele mpe kutala yinki beto lenda sala.”

¹²⁰ Ntangu yayi bawu nyonso kuvukanaka mpe vwanda pesa mutindu na mutindu ya bimbangi.

. . . ba bikaka bawu, ba kwendaka kisika vwandaka bampangi ya bawu, mpe tubaka na bawu mambu nyonso yina bamfumu ya banganga-Nzambi mpe bakuluntu tubilaka bawu.

Na manima ya kuwa mambu yina, bawu zangulaka bandinga na Nzambi na ntima mosi, . . .

Ntangu yayi beno kuwa yinki ba tubaka. Beno tala yandi mbote, beno tala bawu mbote, ba vutukaka ve mpe tubaka, “O . . .” kima mutindu, “O Mfumu, kieleka mu me lomba nge lemvo . . .” Ve. Ba vwandaka ya kuvuuka yimeni. Ba vwandaka ya kifuluka na Mpeve. Ba vwandaka na Luzingu ya Seko.

. . . zangulaka ndinga ya bawu . . . na ntima mosi, mpe tubaka, Mfumu, nge kele Nzambi, . . .

Amen! Mu zola kaka yawu, Mpangi Palmer. Mu zola yawu.

. . . nge kele Nzambi (beto zaba yawu) yina me sala mazulu, mpe ntoto, mpe mubu, mpe nyonso yina na kati ya yawu kele:

*Yina na nzila ya yinwa ya kisadi ya nge David . . .
tubaka, . . .*

¹²¹ Ntangu yayi beno tala mbote, beno ke vutuka, ke tuba, “Ntangu yayi, beto kele ve . . .” Ntangu yayi beno ke basika kuna mpe ke tuba, “Mbote, ntangu yayi, Mfumu, ntangu yayi vingila fyoti awa. Ba ke na kuseka kaka munu mingi!” Yandi zonzaka ve ti ba ke sala yawu?

“Bawu nyonso yina ke zinga na kinzambi na Klisto Yesu ke luta na kutalisa mpasi.”

“Mbote, beno zaba, mfumu ya munu ya kisalu tubaka na munu kana yandi simba . . .” Ba tubaka ve ti bawu ke tuba yawu? “Mbote, beno zaba, ba nataka munu na yinzo ya kufundisa kilumbu yankaka yina, samu na Yawu.”

¹²² Yandi tubaka ve, “Ba ke nata beno na ntwala ya bantinu mpe bamfumu, samu na Nkumbu ya Munu. Beno vwanda na boma ve na yina beno ke tuba, samu ti ya kele beno ve yina ke zonza”? Mu monaka yawu kusalama mazono. “Ya kele Mpeve-Santu yina ke na kuzinga na kati ya beno; Yandi ke zonza.” Beno me mona, “Yandi.” Ya kele kieleka. Mbote. “Beni vwanda na boma ve na yina beno ke tuba.”

Mfumu, na . . . Yina na nzila . . . yinwa ya kisadi ya nge David me tubaka, Samu na yinki mimpani me tomboka, mpe dibanza ya yimbi na kati-kati ya bantu?

Bantinu ya ntoto me kubama samu na mvita, mpe bamfumu . . . vukana samu na kutelemina Mfumu, mpe kutelemina Klisto ya yandi.

. . . ya kieleka, Mfumu, kutelemina mwana ya nge ya santu Yesu, yandi yina nge me kusa, bawu nyonso zole Hérode, na Ponce Pilate, na Bantu ya makanda, mpe bantu ya Israël, . . . vukana kintwadi,

Samu na kusala nyonso yina mutindu nge me kubikaka yawu ntete na ngolo ya nge mpe na luzolo ya nge.

Oh, la la! Mu zola yawu. “Mfumu, ba ke na kusala kaka kima yango yina Nge tubaka ti ba ke sala.” Yinki Biblia me tuba? “Na bilumbu ya nsuka, ya ke vwanda na biseki; bantu ke dasuka na mbangu, ke vwanda na lunangu, ke zola nsayi ya yinza kuluta kuzola Nzambi; ke tala bantu kyadi ve, ke zonza yimbi ya bampangi, ke lenda ve na kukutika banzutu ya bawu, bambeni ya bantu ya mbote; ke lakisa mutindu ya kinzambi, kasi ke manga . . .” Ata mbala mosi ve ti bawu kwendaka na zulu kuna mpe kuzwaka Ngolo: “. . . na manima ya yayi Mpeve-Santu ke kwiza na zulu ya beno.” “Ke lakisa mutindu ya kinzambi, kasi ke manga ngolo ya yawu: kuvwanda ve kintwadi na bawu yina.” Ya kele samu na yina Mpeve-Santu kele. Beno me mona?

. . . yina kele kubikaka . . . ntete.

. . . ntangu yayi, Mfumu, tala mutindu bawu me banda na kutalisa beto mpasi: mpe—mpe pesa ngolo na bisadi ya nge, samu ti beto mwangisa nsangu ya nge na kivuvu nyonso,

Oh, mu zola yawu! Beno katula mukwa ya nsusu ya ntama yina kuna, mpe beno tula mukwa ya mukongo ya kieleka. Ntangu yayi beno tala mbote awa.

. . . beto mwangisa bampova ya nge,

Na kutandaka diboko ya nge samu na kubelusa; . . .

Oh, mpangi! Bampeve ya yimbi ke kufwaka ve, kasi Mpeve-Santu mpe. Beno me mona?

. . . kutandaka diboko ya nge samu na kubelusa; . . . ti bidimbu mpe bimangu kusalama na nkumbu ya mwana ya nge ya santu Yesu.

Beno me mona samu na yinki ba vwandaka sala mambu yina, ve? Ba ke na kusala kima mutindu mosi bubu yayi, kasi ya ke sala ata fyoti mbote ve.

Ntangu bawu manisaka na kusambila, kisika yina bawu vukanaka ninganaka; mpe bawu nyonso kufulukaka na Mpeve-Santu, mpe . . . longisaka ndinga ya Nzambi na kivuvu nyonso.

¹²³ Fiu! Oh! Ba kuzwaka kima ntangu bawu kwendaka na zulu kuna, mutindu yina ve? Nsilulu tubaka ti yina kele yina Mpeve-Santu kele, samu na kupesa beno kivuvu nyonso, samu na kubomba beno, samu na kutula beno kidimbu, kupesa beno kidimbu. Oh, la la!

¹²⁴ Beno kuwa. Oh, kana beto vwandaka kaka na ntangu, beto zolaka kulumuka na Philippe na Bantu ya Samarie. Na Actes 8:14; beno nyonso yina ke na kusonika yawu. Ba kuzwaka kyese ya nene, ba kuzwaka bakubeluka ya nene, kasi bawu vwandaka ya kubotama na Nkumbu ya Yesu Klisto. Kasi ba fidisaka na Jérusalem, na kusosa Pierre; yandi kwizaka mpe tentikaka maboko na zulu ya bawu, mpe bawu kuzwaka Mpeve-Santu. Actes 8:14.

¹²⁵ Na bantu ya makanda, ya vwandaka na mosi ya nkumbu ya Corneille. Yandi vwandaka muntu ya mbote mingi, vwanda futaka bikunku kumi, vwanda tunga ba-synagogue samu na bantu, vwanda pesa buzitu na Nzambi, vwanda zitisa Nzambi; muntu ya mbote, Presbytérien ya mbote, Méthodiste, Baptiste, to kima yankaka, beno me mona, kieleka muntu ya mbote. Kasi kilumbu mosi, Nzambi tubaka, “Yandi kele muntu ya mbote; na yawu mu ke fidisa yandi kaka na lukutakanu. Mu fwana sala mulongi ya munu awa kutubila yandi Yawu.” Mbote.

Na yawu yandi monaka vision, vwanda tuba, “Kwenda na Joppé, mpe nge ke tala muntu kuna ya nkumbu Simon, muntu ke bongisaka bampusu ya bibulu. Mpe ya kele na muntu, Simon

Pierre, na kati kuna. Ti yandi kwiza awa; yandi ke tuba na nge mutindu ya kusala, samu ti yandi me kuzwa kima.”

¹²⁶ Mpe na yina Pierre vwandaka ya kutelama kuna. . . Mpe Corneille zolaka sambidila mulongi yango. Yandi zolaka. Kasi Pierre tubaka, “Telema. Mu kele muntu mutindu nge.”

“Mpe na ntangu Pierre vwandaka zonza ntete Bampova yayi,” na mutindu ba vutukaka, na mbandukulu na. . . Bima mutindu mosi yina mu ke na kuzonzilaka, mutindu Nzambi silaka na kutsyamuna Mpeve-Santu. “Na yina yandi zonzaka Bampova yayi, Mpeve-Santu kubwaka na zulu ya bawu.” Fiu! Yinga. Ya kele yina Mpeve-Santu kele, ya nani Yawu kele. Kieleka. “Mpe bawu nyonso kufulukaka na Mpeve-Santu.”

¹²⁷ Ntangu yayi beno tala na Éphésiens, ya vwandaka na mpangi ya bakala ya Baptiste. Yandi vwandaka ntete muntu ya misiku, ya mayela mingi, muntu ya mayela, yina zabaka musiku; muntu ya nene, muntu ya mayela ya kulutila. Kilumbu mosi yandi vwandaka tanga Biblia, mpe yandi monaka kuna ti muntu mosi na nkumbu ya Mesiya ke kwiza. Mpe na yina yandi salaka yawu, oh, yandi bandaka na kuwa na Yesu yayi, mpe yandi tubaka, “Mu me ndima. Mpe mu ke tuba pwelele lukwikilu ya munu ti Yesu kele Klisto, Mwana ya Nzambi.” Yandi vwandaka Baptiste ya kieleka. Awa yandi me baka nzila, “Mu ke tuba pwelele ti Yesu kele Klisto.” Yandi vwandaka sala yawu mingi ti Nzambi kubokilaka yandi na kisalu ya kulonga. Nzambi ke zonza ntangu nyonso na ntima ya kieleka.

¹²⁸ Mpe ya vwandaka na mwa biboba yina vwanda tungaka batenta kuna ya bankumbu Aquilas na Priscille, bakala na kento. Ba vwandaka bantu vwanda tungaka batenta. Actes kapu ya 18, ke tubila beno yawu. Paul, bawu vwandaka bampangi ya yandi. Ba kuzwaka Mpeve-Santu na maboko ya Paul mpe na malongi ya yandi.

Bawu kuwaka ti ya vwandaka na reveil kuna, na yawu bawu kwendaka. Ya vwandaka kaka na kutala bantu kumi to kumi na zole kuna. Na yawu yandi kwendaka kuna na kutala yawu, mpe yandi kuwaka mulongi yayi kulonga, kieleka ya ntima ya yandi. Yandi tubaka, “Beni zaba, mu ke kwikila ti yandi ke kuwa Kieleka.”

Na yawu na manima ya lukutakanu me manisa, yandi bokilaka yandi na manima ya tenta, mpe tubaka, “Tala, beto kele na mwa mpangi ya bakala na kutala nene mutindu, mwa Juif mosi ya mbombo ya kukota, mpe, kasi ntangu yandi ke kwiza, yandi ke longi nge Ndinga ya Nzambi pwelele.” Mbote, na manima ya mwa ntangu. . .

¹²⁹ Paul vwandaka na boloko na ntangu kaka mosi. Kisika mosi ya mawa samu na mulongi ya malongi ya ntangu yayi, mutindu yina ve? Kasi yandi vwandaka na boloko, mpe Mfumu salaka yandi kuvwanda kuna. Na yawu na manima kuningana ya

ntoto kusalama, ya ningisaka bibaka ya boloko, yandi bakaka mukengi mpe dikanda ya yandi mpe botikaka bawu nyonso, na Nkumbu ya Mfumu Yesu, na manima yandi kwendaka, kwendaka kuna.

Mpe yandi vwandaka me basisa kaka mpeve ya yimbi na mwa, mwana ya kento ya kukula yina vwandaka sala bambikululu. Mpe, kuna, ba vwanda sala mbongo mingi na nzila ya yandi, na yawu samu yandi lakisaka mayela ya bawu ya yimbi, na yawu kuna ba tulaka yandi na boloko samu na yina. Mpe Mfumu ningisaka bibaka ya boloko, samu ti yandi vwandaka na nkonga ya bantu kuna na kuwa Kieleka. Beno lenda ve kukanga Ndinga ya Nzambi. Ya kele. . . Ata nyonso yina, beno lenda ve. Beno lenda kaka ve kusala yawu.

¹³⁰ Na yawu yandi kwendaka kuna kisika muntu yayi vwandaka. Mpe Aquilas na Priscille, ya lendaka vwanda ti ba vwandaka na ba-sandwiche. Mpe kaka na nswalu na manima ya kudya ba-sandwiche, tubaka, “Beto ke kwenda na kisika ya reveil.”

Paul ya kuvwanda na manima kuna mpe vwandaka na maboko na mwa kinkuti ya yandi, mpe vwanda kuwa mulongi ya Baptiste yayi kulonga.

Yandi tubaka, “Ya kele mbote, yina beno ke na kulonga, kasi ya kele dyaka na mingi ya Yawu.” Yandi tubaka, “Mu zola pesa beno kyuvu, Docteur Apollos. Beno kuzwaka Mpeve-Santu ntangu beno kwikilaka?”

“Oh,” yandi tubaka, “beto vwanda zaba ve ti ya vwandaka. Yinki nge zola kutuba, na ‘Mpeve-Santu’? Beto kele ba-Baptiste.”

Yandi tubaka, “Wapi mutindu beno me zaba ti beno kele ba-Baptiste?” Beno me mona?

“Mbote, ba botikaka beto. Beto zaba kaka mbotika ya Jean.”

Yandi tubaka, “Yandi botikaka kaka samu na kufungula masumu, yandi vwanda tuba na ‘kukwikila na Yandi yina vwandaka kwiza,’ ya kele Yesu Klisto.”

Mpe ntangu yandi kuwaka yayi, ba kubotamaka dyaka, na Nkumbu ya Yesu Klisto. Mpe Paul tentikaka maboko ya yandi na zulu ya bawu, mpe Mpeve-Santu kwizaka na zulu ya bawu, mpe bawu zonzaka na bandinga ya malu-malu mpe pesaka baprosesi. Yandi tubaka, “muntu nyonso.”

¹³¹ Ntangu yayi, ntangu yayi, wapi mutindu ba ke salaka yawu? Mu zola kutuba na beno kima, na manima mu. . . Beto ke sukisa, samu ti, ya kele, mu tubaka na beno ti mu ke bika beno kukwenda na ntangu ya mbote. Beno zaba yinki Mpeve-Santu kele. Samu na Masonuku ya nsuka na nkokila yayi. . . mu ke dyaka na mingi ya kutandama awa, kasi beto ke bika yawu. Beto baluka na ya Ntete ya Corinthiens 12. Mpe kuna beto ke tanga

yayi, mpe na manima beto ke—beto ke sukisa. Mbote mingi. Ya Ntete ya Corinthiens, kapu 12.

Bantu yikwa ke kwikilaka na malongi ya Santu Paul? Kieleka! Yandi tubaka, na Galates 1:8, “Kana Wanzio kulonga kima yankaka, ti yandi vwanda ya kusinga,” wapi mutindu ya ke vwanda ya kulutila samu na mulongi. “Kana Wanzio katuka Mazulu kulumuka mpe longa kima yankaka, ti yandi vwanda ya kusinga.” Beno me mona, beno kuzwa kima ve ya kusala na yawu.

¹³² Ntangu yayi beno tala mbote yayi, ya Ntete ya Corinthiens 12. Bantu—bantu yikwa zaba ti beto fwana vwanda na kati ya Klisto samu na kukwenda na mvumbukulu ya lufwa, samu ti ya kele Nzutu ya Yandi ti Nzambi silaka na kuvumbula na mafwa? Ya kele na mutindu yankaka ve. Ya kele na mutindu yankaka ve, kana beno kele na ngaanda ya Klisto.

Beno lenda tala na manima *awa* mpe kukwikila na Yandi, na kutubaka, “Kieleka, mu ke kwikila Yandi. Yandi kele Mwana ya Nzambi.” Mbote, mpangi ya munu, mu kele ya kuyilama na kupesana diboko ntangu beno ke tuba yawu. “Mu ke kwikila na Yandi. Mu ke tuba Yandi mutindu Mvulusi ya munu.” Ya kele mbote, kasi beno kele ntete ve na kati ya Yandi. “Mu ke pesana maboko na mulongi. Mu ke fungula masumu ya munu.” Yina dyaka kele ve kuvwanda na kati ya Yandi.

¹³³ Ntangu yayi beno tala mbote, beno mona yina Paul tubaka, mutindu beno ke kota na kati ya Klisto. Wapi mutindu ba ke zaba beno mutindu ya kuzengisa bubakala? Na Abraham, ba pesaka kidimbu. Beno kuwa yayi ntangu yayi, ya Ntete ya Corinthiens, kikapu 12, mpe beto banda na nzila ya 12.

Mutindu mosi mpe, nzutu kele kaka mosi, kasi yawu . . . na binama mingi, mpe ata ti binama yango kele mingi, yawu ke yidikaka nzutu kaka mosi: mutindu mosi mpe kele Klisto. (Ya kukabuka ve. “Mosi!”)

Beno kuwa. “Samu ti na dibuundu mosi”? Bantu yikwa ke na kutangaka na manima ya munu? “Na nzila ya kupesana maboko mosi”? “Na nzila ya maza mosi”? Ve. Kuna muntu me zimbana.

“Na nzila ya Mpeve mosi!” Ya kele na ya nene? Kuna, ya kele, “Mpeve-Santu.” Beno me mona?

. . . na nzila ya Mpeve mosi beto nyonso kele ya kubotika na kati ya nzutu mosi, kana beto kele ba-Juif to Bantu ya makanda, kana beno kele bandongo to bantu ya kimpwanza; mpe beto nyonso kunwaka na Mpeve mosi.

¹³⁴ Nzutu ya Klisto kele Mpeve mosi, kisika konso kinama, katuka Pentecote tii ntangu yayi, ke kunwaka na Vinu ya malu-malu mosi, Mpeve-Santu mosi, ke pesa bandandu mosi. Yinki mutindu beto ke salaka yawu? “Na nzila ya Mpeve mosi.”

Ya kele mwelo ya Nzambi ya kufunguka, Mpeve-Santu. Yinki Yawu kele? Yawu kele mwelo ya kufunguka ya Nzambi. Yawu kele kidimbu mosi. Yawu kele kidimbu. Yawu kele Kisadisi. Yawu kele Avoka. Yawu kele kivuvu. Yawu kele kupema. Yawu kele ngemba. Yawu kele bumbote. Yawu kele kubeluka. Yawu kele Luzingu. Yawu kele—Yawu kele mwelo ya kufunguka ya Nzambi samu na bima nyonso yayi. Yawu kele mwelo ya kufunguka ya Nzambi na Klisto, yina ke . . .

Nzambi lakisaka ti Yandi vumbulaka Yesu na lufwa, mpe bayina ti kele ya kufwa na Klisto Nzambi ke nata bawu na Yandi na mvumbukulu ya lufwa. “Beno nyongisa ve Mpeve-Santu na nzila ya yina beno kutulamaka kidimbu na kati ya Klisto tii kilumbu ya beno ya lukululu.” Fiu! Bantu yikwa ke kwikila yawu?

¹³⁵ Yinki kele Klisto? Yinki kele Mpeve-Santu? Yawu kele ve kima yina bantu ke sekaka. Yawu kele kima bantu ke sekaka; kasi yina ve, samu na mukwikidi.

Samu na muntu ya ntembe! Mu zola kuzwa balumingu zole to tatu ya yinda, mu zola kubaka mbasi na nkokila mpe kutubila beno yinki Yawu kele samu na muntu ya ntembe. Mu ke baka mwa ntangu fyoti kaka, samu na kutanga yawu na nswalu. Yawu kele kuseka ya nene. Yawu kele mutambu. Yawu kele ditadi ya kubwisa. Yawu kele lufwa. Yawu kele kukabuka ya Seko na Nzambi. Mu ke na kulenda kaka kubanza ve yina Yawu kele samu na muntu ya ntembe!

¹³⁶ Beno bambuka moyo, mvula mosi yina muntu ya ntembe vwandaka sekaka, vwandaka mvula mosi yina vuukisaka Noé na dikanda ya yandi. Beno me mona? Mpeve mosi, Mpeve-Santu yina bantu ke na kuseka mpe ke na kutuba kele “bulawu, mpe nkonga ya bantu ya kulawuka, Yawu kele bulawu,” Ya kele kima mosi yina ke Zangula Dibuundu mpe ke nata Yawu na zulu na bilumbu ya nsuka; ke nata lusambusu na mumpani. Ya kele kieleka. Ya kele yina Mpeve-Santu kele.

¹³⁷ Kyese na bayina kele . . . Kana mu lenda tuba yayi, na kieleka ya ntima ya munu. Kyese na bayina kele na nsatu mpe mpwila ya Yawu, samu ti bawu ke fuluka.

¹³⁸ Mbasi na nkokila beto ke zonzila na mutindu, yinki Yawu ke salaka ntangu Yawu ke kwizaka.

¹³⁹ Ntangu yayi, bantu yikwa awa zola kuzwa Mpeve-Santu, mpe zola muntu kusambila samu na beno, samu beno kumona Nsemo?

beno zaba “yinki Yawu kele.”

Ntangu yayi, mbasi na nkokila, beto ke baka, “yinki Yawu ke salaka.”

¹⁴⁰ Mpe na manima na nkokila yina ke landa, kele, “wapi mutindu ya kuzwa Yawu.” Na manima beto ke bokila bantu, ke

pesa bawu malongi awa, mpe kukwenda mbala mosi na kati ya bivinga mpe kuvwanda kuna, kana ya ke baka Nowele nyonso muvimba, ya kele ya kulunga, tii ntangu Mpeve-Santu ke kwiza. Beto ke belama na Yawu landila fondasio, ya ngolo ya Biblia. Beto ke bakila Yawu mpe kuzwa Yawu kaka mutindu Nzambi silaka Yawu, mpe mutindu Yawu kubwaka na mbandukulu. Ya kele mutindu beto kele awa na kusala yawu. Mu . . . Ya ke sala ata luswaswanu ve na yina muntu yankaka ke tuba, beto kele . . .

Ndinga ya Nzambi kele . . . ke na kisika ya ntete na kati ya ntima ya munu. Ya kele kieleka. Mpe mu zola yina Nzambi kele na yawu samu na munu. Kana ya kele na kima ya kulutula, fungula Mazulu, Mfumu, samu ti ntima ya munu—ya munu kele ya kufunguka samu na yawu. Ya kele kieleka.

¹⁴¹ Bantu yikwa zola Yawu? Ntangu yayi beno telemisa diboko ya beno, tuba, “Sambila samu na munu.” Ntangu yayi, na yina beno ke vwanda kaka, na maboko ya beno na zulu.

Tata ya beto ya Mazulu, beto me longa ntangu mingi. Kasi Mpeve ya Nge kele awa. Ya kele na maboko na zulu na ntangu yayi. Mpe bawu zaba yinki Yawu kele, bawu zaba yinki Mpeve-Santu zola kutuba. Mu ke sambila, Nzambi, ti ntete balukutakanu yayi kusuka, ti konso diboko awa kutelama samu ti bawu me kuzwa Yawu. Pesa yawu, Mfumu.

¹⁴² Beto ke sambila samu na bawu. Beto ke lomba Nge na kusakumuna bawu, mpe na kupesa bawu nsatu ya ntima ya bawu. Tala maboko ya bawu, Mfumu. Ba zola Nge. Ba zola Yawu. Ba zaba ti ba lenda kwenda ve . . . Mbasi na nkokila, kana Nge sadisa munu, Mfumu, beto lenda lakisa yawu na kati ya Masonuku ti ata mbala mosi ve ba ke lenda Enlevement kukondwa Yawu. Na yawu mu ke sambila, Tata, ti Nge ke pesa bawu nsatu mpe mpwila, samu ti bawu vwanda ya kifuluka. Mu me lakisa bawu na Nge ntangu yayi, Tata. Mpe, pesa balusakumunu yayi, na yina beto me lomba yawu na Nkumbu ya Yesu. Amen.

Mu zola Yandi, mu zola Yandi
Samu Yandi zolaka munu ntete
Mpe futaka mpulusu ya munu
Na yinti ya Calvaire.

¹⁴³ Mu zola kutuba yayi ntete beto yimba dyaka. Mu zola kukutana na nkonga ya milongi na kivinga awa, Kilumbu ya tanu na nkokila, ntete lukutakanu kubanda, beno me mona, Kilumbu ya tatu na nkokila. Mu . . .

Beno me mona yinki mu ke na kumeka na kusala? Na kulakisa yinki Yawu kele, wapi mutindu ya kubelama na Yawu mpe yinki ya kuzitisa; kuna beno ke kwiza mutindu muntu ya kufwa meso ve, na kututaka na kima. Ya kele samu na yina mu me lomba yawu ve na nkokila yayi. Mu zola beno kuzaba yinki

Yawu kele. Yawu kele nsilulu. Yawu kele kidimbu. Yawu kele Kisadisi. Yawu kele nyonso yina.

Na yina, mbasi na nkokila mpe nkokila yina ke landa, kuna beto ke banda kaka kuna, na kisika yina, tii Yawu ke kwiza. Beno tala ntangu yawu ke baka ve; beto ke vwanda tii kuna. Beno sukula ntima ya beno. Ata mbala mosi ve ti Yandi ke tsyamuna Yawu na ntima ya kuvedila ve. Beno sungama, beno yilama, mpe Yandi ke pesa yawu.

Mu zola Yandi, mu zola Yandi

Beto telemisa maboko ya beto ntangu yayi.

Samu Yandi zolaka munu ntete

Mpe futaka mpulusu ya munu

Na yinti ya Calvaire.

Pasteur vwanda me tuba, mpe beto me ndima, ti mbasi na nkokila beto ke banda na ngunga ya sambwadi na kisika ya ndambu ya ngunga ya sambwadi. Mpe yina ke sala munu kubika beno kubasika na ndambu ya ngunga ya nana na kisika ya ndambu ya ngunga ya yivwa. Na ndambu ya ngunga ya sambwa-...Na ngunga ya sambwadi, mbasi na nkokila, bankunga ke banda. Mu ke banda Nsangu ya munu na ndambu ya ngunga ya sambwadi.

Mu zola Yandi,

Beto baka bamuswale ya beto mpe beto ningisa yawu samu na Yandi.

Mu zola Yandi

Beno katukila kaka kuyekama ya misiku ntangu yayi!

Samu Yandi zolaka munu ntete

Mpe futaka mpulusu ya munu

Na yinti ya Calvaire.

Mbote mingi, pasteur ya beno ntangu yayi, Mpangi Neville.



59-1216 Yinki Kele Mpeve-Santu?
Branham Tabernacle
Jeffersonville, Indiana U.S.A.

KIKONGO-KITUBA

©2021 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kiasadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org